

ANG PAGKALUMPAG SA KALIBUTAN



Salamat kaayo, Igsoong Neville.

Maayong buntag, mga higala. Bag-o ra kong nakahigda sa higdaanan ganinang buntag unya kinahanglan ko na usab mobangon, busa medyo kapoy pa ako. Dili ko unta . . . mianhi ko nga mora'g wala gyud damha. Si Igsoong Shakarian, sa Full Gospel Businessmen, ang presidente sa niining kalihokan, mao'y . . . Nasakit man gud ang iyang asawa, ug mao nga . . . ug gidala siya ngadto sa ospital.

² Ug ang mopuli para sa usa ka tawo nga sama kaniya usa gayud ka dakung tahas, ug nagpahigayon pa gyud og dakung panagtigum kagahapon.

³ Ug miabot man si Igsoong Arganbright, ug nangadto kami didto. Ug, bueno, mibangon ako sa alas kuwatro, kagahapon sa buntag, ug milarga kami paingon sa Cincinnati. Ug tibuok adlaw ang among biyahe. Ngani bag-o lang ko nakauli, nakaabot. Nakaabot kami mga pabanagbanag na, kaganinang buntag. Ug mao nga mibangon ako, nga pagaw na, apan ania gihapon kami pinaagi sa grasya sa Dios.

⁴ Nahunahuna ko kung nakaanhi kaha si Igsoong Arganbright. Ania ka ba, Igsoong Arganbright? Tingali'g nahinanok pa gihapon siya sa mga bukton ni Morpheus. Wala mo kaila kung kinsa si Morpheus; usa siya ka paganong diosdios sa Romano, ang dios kono sa pagkatulog.

⁵ Busa pasensyahi lang úsa ko ninyo og diyutay tungod nga pagaw ang akong tutunlan karong buntaga, ug paningkamotan ko nga dili kamo langanon og ayo.

⁶ Ang akong katuyoan sa pagpahigayon og panerbisyo karong buntaga mao'y tungod sa . . . dili tungod sa mga tawo. Sa sunod Domingo ipaambit ko unta ang akong—ang akong pang-Pasko nga mensahe, apan, kung akong—akong buhaton, nan sigurado nga daghang tawo ang maggikan pa sa gawas sa lungsod, og basin madisturbo hinoon ang ilang Pasko, kabalo na mo, sa pagpauli nila. Ug busa nahunahuna ko nga mas maayo siguro kung karong buntaga na kita magatigum ug mosimba sa Ginoo, sa ingon-ani nga paagi, para sa akong bahin sa pang-Pasko nga panerbisyo. Ug dayon sa sunod Domingo mahimo na kamo nga magpabilin sa inyong . . . Kung nanimuyo kamo sa halayo, mahimo na kamo nga magpabilin sa inyo mismong simbahan kung taga asa man kamo, o unsa man ang gusto ninyong buhaton.

7 Ug gusto kong pasalamatan ang maong igsoon tungod sa maanindot nga awit. Mao gyu'y pag-abot nako samtang ginaawit kadto. Maanindot gayud kadto. Ug kanunay kong madungog ang akong asawa ug silang tanan nga ginapasigarbo ang pag-awit sa maong igsoon, ug nagkaaduna ako og unang higayon nga madungog siya nga nagaawit, mismo, og sa ubang lugar nga dili sa tabernakulo. Karon, dili ba kahibulongan kana? Ang atong igsoon nga taga-dinhi sa tabernakulo, ug kinahanglan pa gyud ko nga moadto sa Shreveport, Louisiana, aron madungog siya nga moawit sa una niyang awit. Talagsaon gayud nga butang, dili ba?

8 Ug dayon nahunahuna namo nga tingali sa pagbuhat niini, maghatag kini kanato og panahon... nga—nga magkatigum. Ug usab ingon nga dili maayo ang kahintang sa kadalanan. Nahunahuna ko kung nakaabot ba kaha sila Igsoong lalaki ug Igsoong babayeng Dauch gikan sa Ohio. Nakaabot ba sila? Asa man ka, Igsoong Dauch? Oo, oo. Nahunahuna ko lang. Daghan ba kaayo og niyebe didto sa inyo? Daghan kaayo og niyebe. Bueno, hinoon, wala man sila'y niyebe didto sa Cincinnati. Dinhi gani dili man usab ingon ka daghan. Mora'g halos wala gyu'y niyebe. Ug kagahapon ang unang higayon nga nakawali ako sa Cincinnati, ug nagkaaduna kami og maanindot nga adlaw, sa usa ka bag-ong sanga nga wala pa'y usa ka tuig, ug usa kini ka maanindot nga sanga, nga may pipila ka mga maayong tawo. Nalipay gyud kami sa pagpakig-fellowship. Bueno bag-o lang nila ako gitawgan karon nga moadto kono ako sa Columbus ugma, para sa pagdidikar sa usa pa ka sanga, ug, o buluhaton, nga si Igsoong Shakarian unta ang moadto, pero... ug kinahanglan ko unang iampo kana. Usa kini ka...

9 Kinahanglan kong moadto sa Phoenix pagkahuman niini, kabalo mo, ug aduna kami... Moadto kami sa Phoenix sa ikadose, sa pagpamahaw sa businessmen. Ug wala pa ko kabalo kung asa kini ipahigayon. Sa tan-aw ko mora'g sa Ramada, ipahigayon didto sa—sa Ramada. Ang sanga sa businessmen aduna ma'y regular nga pagpamahaw didto. Ug dayon sa Dominggo magsugod na ako, ug sa Dominggo, sulod sa mga dose ka adlaw nga makalibot-libot pud sa Maricopa Valley, Phoenix, Tucson. Ug aduna ako'y bangkete sa Lunes sa gabii, sa sunod nga Lunes sa gabii, didto sa Tucson, usa—usa ka bangkete kauban ang mga ministro ug ang Full Gospel Business Men sa Tucson. Ug pagkahuman mobalik na pud sa Phoenix, ug sa tan-aw ko sa Glendale ug sa nagkalainlaing mga lugar. Ug dayon magsugod ang konbensyon sa ikabaynte... Kanus-a gani kana, Igsoong Fred? Nadumduman mo ba... Ikabaynte-kuwatro, ikabaynte-kuwatro hangtud ikabaynte-otso o ikabaynte-nuebe, mora'g ingon niana. Ug pagkahuman, kon itugot sa Ginoo, makauli na. Tan-awon nato kung unsa ang mahimong pag-uswag nato dinhi, tan-awon usab ang mahitungod sa Pito ka Selyo o ang... gikan

niana nga panahon, ug tan-awon kung asa kita paingon gikan niana.

¹⁰ Karon, nagatoo ko nga adunay nagsulti kanako nga aduna kita og gagmay'ng mga masuso dinhi karong buntaga nga igahalad. Husto ba? Aduna ba'y inahan nga adunay masuso nga igahalad? Adunay gisulti si Doc sa ako. Bueno, tingali'g nasayup lang ko. Oh, oo. Oo. Oo, sir, kini diay sila. Sige, mahimo ba mga igsoong babaye o mga igsoong lalaki nga dalhon ninyo dinhi ang inyong gagmay'ng mga bata? Salamat, igsoong babaye. Sa tan-aw ko tukma gayud kini nga panahon para dalhon ang mga bata, kay Pasko man. Igsoong Neville, mahimo ba? Karon, samtang ginadala niining mga minahal sa kinabuhi ang ilang gagmay'ng mga bata karong buntaga, kini'y—kini'y igo lamang. . .

¹¹ Karon, daghang mga tawo, sa daghang mga kasimbahanan, ug—ug kung adunay pipila kaninyo nga nakatambong sa konbensyon kagahapon, kung unsa nga si Igsoong Brown, nga Episcopalian nga puno sa Espiritu Santo, nangayo og pasaylo sa mga Pentecostal nga magtotoo, mahitungod sa pagbautismo sa mga masuso, tungod kay, ingon-ana kono ang iyang ginabuhat kaniadto. Mao nga ang Episcopalian nagapangbautismo gyud, pinaagi sa pagwisik-wisik, nga mao'y ilang ginatawag nga pagbautismo.

Ang *pagbautismo*, para kanako, nagakahulogan og “paglusbog, pagpailalum, usa ka paglubong.”

¹² Ug, apan daghan kanila nga ingon niana ang ginabuhat. Karaan na kana nga. . . Usa kana ka pamaagi nga naggikan sa iglesiang Katoliko, ug nga gipadayon sa Methodist ug sa Episcopalian, Lutheran ug daghan kanila nga ingon niana ang ginabuhat. Ingon niana ang ginabuhat sa mga Methodist. Mao kana ang hinungdan sa panagbulag tali sa Nazarene ug sa iglesiang Methodist, ang pagbautismo sa masuso. Ang Nazarene halos sama ra gayud sa Methodist, gawas lang sa pagbautismo sa masuso, ug mao nga migawas sila tungod niana nga butang.

¹³ Ang Church of Christ usa pud ka Iglesiang Cristohanon, tanan-tanan gawas lang sa musika sulod sa simbahan. Ug busa, oh, mao kana ang ginagmay'ng mga hilisgotan nga mao'y hinungdan nga nagkabulag-bulag sila ug naguba ang pagkamanagsoon ug mga ingon-anang butang! Usa ra man kitang tanan diha kang Cristo Jesus, pinaagi sa. . . Dili kamo mahimong magpamiyembro sa usa ka iglesia. Kamo—nagapamiyembro kamo sa usa ka kapunongan, pero dili kamo mahimong magpamiyembro sa usa ka iglesia, kita n'yo, tungod kay kinahanglan ninyo nga matawo sa iglesia. Usa kini ka espirituhanong pagkahimugso. Ug bueno ang uban adunay nagkalainlaing mga ideya ug, nagapakig-uban lang kita kanila, okey ra kana.

¹⁴ Pero sa—sa ato dinhi sa tabernakulo, gusto lang natong magpabilin sa eksaktong paagi nga gisulti sa Biblia sa pagbuhat niini. Kung unsa mismo . . . Ug wala ma'y Kasulatan sa Biblia alang sa pagbautismo sa usa ka masuso. Walay Kasulatan sa Biblia alang sa pagwisik-wisik. Ug busa ang bugtong Kasulatan nga anaa sa Biblia nga gisulti ni Jesus nga, Siya man ang atong Ehemplo, ug sa dihang gidala nila Kaniya ang mga bata gipandong Niya ang Iyang mga kamot ngadto kanila ug gipanalanginan sila, ug miingon, “Pasagdi ninyo ang gagmay'ng mga bata nga moduol Kanako, ug dili ninyo sila pagdid-an, kay alang kanila ang Gingharian sa Langit.” Karon, mao kana ang paagi nga ginapaningkamotan natong ipadayon.

¹⁵ Karon, nahibalo kita, samtang ako ug ang pastor nagapandong og mga kamot nganhi niining mga masuso, mahuyang nga pangpuli ang among mga kamot para sa atong Ginoo, tungod kay ang sa Iyaha balaan man. Apan kung gikinahanglan Niyang mangita sa tibuok kalibutan karong buntaga og usa ka balaan nga kamot, asa kaha ninyo makaplagan kana? Walay ingon-anang butang, kita n'yo, sa yuta. Apan pinaagi sa Iyang grasya ginarepresentar nato Siya. Ug ang mga bata dinhi nga atong ihalad, igapandong namo ang among mga kamot diha kanila ug maghalad og pag-ampo ug pagpasalamat tungod kay gihatag Niya sila ngadto niini nga mga ginikanan, ug hinaut nga mamahimo silang gagmay'ng mga bulak sa inyong panimalay aron makatabang nga madan-agan ang dalan samtang kamo nagapanaw. Hinaut nga mapadaku sila diha sa pagpahamatngon sa Dios. Ug hinaut nga kining gagmay'ng mga bata karon mamahimong mga halangdong mamumuhat, kung aduna pa'y ugma, diha sa Gingharian sa Dios, mao kana ang atong sinserong pag-ampo. Oo. Hinaut nga magapanalangin ang Ginoo.

¹⁶ Tan-awon nato, sa tan-aw ko sugdan nato dinhi, sa niining gamay'ng, itum-ang-buhok nga lalaki nga nagatutok gyud og ayo kanako. Medyo . . . Oh, grabe! Ania unta ang akong asawa aron kugoson kining gamay'ng bata. Mahadlok man gud ko kanunay nga basin mapiang sila, nakita n'yo. Grabe, pagkatahum gayud nga gamay'ng bata! Kumusta ka? Pagkatukma gayud nga panahon, sa dihang, “Sa pasungan, adunay nakaplagan nga usa ka Bata,” usa ka panahon sa Pasko, aron ihalad ang mga bata pabalik sa Dios. Unsa man ang iyang ngalan? Samuel Thomas. Bueno, maanindot kaayo kana nga ngalan.

Iduko nato ang atong mga ulo.

¹⁷ Langitnon namong Amahan, sa pag-anhi niining malipayong magtiayon karong buntaga nga dala kining gamay'ng bugkos sa kalipay nga Imong gidugang sa ilang panaghiusa, ang gamay'ng si Samuel Thomas, Amahan nga Dios, ginaampo namo nga Imong panalanginan kining

maong bata. Ug samtang ginabayaw namo siya diha sa Imong Presensiya niining buntaga, Ginoo, aron panalanginan sa Imong balaan og dili-makitang mga kamot ang maong bata. Hinaut nga mamatuman, Ginoo, nga ang bata padayon nga mabuhi. Ug kung aduna pa'y ugma, hinaut nga mamahimo siyang halangdon nga mamumuhat alang sa Gingharian sa Dios. Panalangini ang mga ginikanan niini. Ug karon, Amahan, among ginahalad Kanimo ang gamay'ng si Samuel Thomas, sa Ngalan ni Jesus Cristo, alang sa usa ka hinalad nga kinabuhi para sa Gingharian sa Dios. Amen.

¹⁸ Panalanginan ka sa Dios ug ang imong bana, ug hinaut nga magkaaduna kamo og kalipay. Ug hinaut nga magkaaduna og masanag nga gamay'ng kahayag sa inyong kinabuhi, sa tibuok ninyong panaw. Panalanginan kamo sa Dios.

¹⁹ Karon, mao ba kini ang gamay'ng bata? [Nagaingon ang inahan, "Oo," dayon mihimo og pagtingog ang bata—Ed.] Karon, dili nako masabtan kana nga pinulongan. Kabalo ko kung unsa. Kabalo ko kung unsa—kung unsa ang ginapasabot nila, apan dili lang nako masabtan.

²⁰ Niadtong atua ako sa Germany dili pa lang dugay, dili gyud ko makasulti ni usa ka pulong. Miingon ko, "Apan adunay usa ka butang mismo, mahitungod kaninyo nga mga German dinhi," miingon ko, "Dili nako masabtan." Miingon ko, "Ang matag. . . samtang nagalakaw ako sa dalan, ug may inahan nga nagkugos og usa ka masuso, ug nagahilak ang masuso sa Iningles."

²¹ Bueno, nagatoo ko nga may kinahanglan siyang buhaton. Puston ta pud ka og ayo, pag-itunol ka namo kang Meda. Maputos man gud sila niining butanga, kabalo na mo, magpuyo na lang. [Nagaingon ang inahan, "Alicia Kay."—Ed.] Alicia Kay. [Adunay nagaingon, "Carlyle."] Carlyle. Alicia Kay Carlyle, kana'y maanindot kaayo nga ngalan. Gusto ko kana. Mahimo mo bang dalhon ang gamay'ng igsoong babaye dinhi? Hum! Oh, naapil ko siguro ang imong kamot, usab, igsoong babaye?

²² Bueno, kabalo mo, sa dihang ginadala kaniadto sa Israel ang ilang halad (nga akong giwali kagahapon) ngadto sa altar, kita n'yo, ilang ipandong ang ilang mga kamot diha niini, tungod kay ginapaila man nila ang ilang kaugalingon ngadto sa ilang halad.

²³ Ang imong mga kamot ibabaw sa imong masuso, mao kana ang nagapaila kanimo uban sa bata. Husto ba? Ug ginapandong namo ang among mga kamot diha niini, nga ginapaila namo ang among kaugalingon diha sa pag-ampo sa Dios, alang niining gamay'ng Alicia Kay. Husto ba? Carlyle.

²⁴ Langitnon namong Amahan, ginabayaw namo nganha Kanimo, kining batang babaye, Dios, kining bugkos sa kalipay nga gikahatag ngadto niini nga pamilya. Panalangini kining gamay'ng batang babaye, Ginoo, kining matahum nga gamay'ng bata nga akong gikugos karong buntaga, ingon nga ginadala

sa inahan kining masuso. Gihatag Mo kini sa iyaha, ug karon ginahalad usab niya kini nganha Kanimo. Ginapakita niini ang iyang pagtoo ug tinguha, Ginoo, nga ang iyang anak mapadaku diha sa pagpahamatngon sa Dios. Panalangini siya, Ginoo, ug hinaut nga mabuhi siya og hataas nga malipayon ang pagkinabuhi, ug mamahimong usa ka halangdong alagad alang Kanimo sa umalabot, kung aduna pa'y ugma. Panalangini ang panimalay nga iyang gigikanan. Itugot kini, Ginoo. Karon, ginatugyan namo nganha Kanimo kining hiligugmaon nga batang babaye ingon nga paghalad, sa Ngalan ni Jesus Cristo. Amen.

²⁵ Karon, dili ba pagkatahum gyud niana, nga gamay'ng bata! Kabalo mo, ang masuso sa matag inahan mao ang pinakamatahum sa ibabaw sa yuta. Ingon niana, dili ba? Panalanginan ka sa Dios, usa ka gamay'ng matahum gayud nga bata. Nagatan-aw nako, nagasiplat-siplat nga ingon niana. Karon nalubag ko ang *akong* kamot.

²⁶ Karon, kumusta ka? Bueno, pagkatahum gayud niini, nga batang babaye, usab! Unsay iyang ngalan? [Nagaingon ang inahan, "Letha Ann Farmer."—Ed.] Letha, Aletha Ann. ["Letha."] Letha Ann Farmer. Grabe, pagkatahum gayud, nga batang babaye! Mahimo ba nga moduol ka sa ako, Letha? Kita n'yo? Buotan gyud. Karon, pagkatahum nga batang babaye, usab. Maanyag siya, usab. Ganahan ka bang moadto sa simbahan, Letha? Karon, nahunahuna ko, nga ang gagmay'ng mga bata nga sama niini ang gikugos kaniadto sa atong Ginoo diha sa Iyang mga kamot. Mag-igsoon ba sila? ["Oo."] Abi ninyo, nagatindog ako dinhi karon, kung unsa nga gibati gyud nako. Nasabtan n'yo ba ang buot kong ipasabot? Kung unsa kamahinungdanon ang kaminyoon o kung unsa kamahinungdanon ang paghalad? Nagabarug kamo sa dalan sa Dios. Oh, grabe! Gipangulbaan gyud ako.

Iduko nato ang atong mga ulo.

²⁷ Oh Dios, nagaduol kami karong buntaga dala kining bata nga si Letha. Ug nagaampo kami, Langitnong Amahan, nga panalanginan Mo si Letha ug ang tanan nga iyang pagabuhaton sa kinabuhi. Hinaut nga mabuhi siya og hataas, malipayon ang pagkinabuhi. Panalangini ang iyang mga ginikanan. Hinaut nga mapadaku siya diha sa usa ka panimalay, Ginoo, nga pasidunggan ug simbahan ang Dios. Ug ginaampo ko nga kung aduna pa'y ugma, kung magkaaduna pa man, siya'y mahimong usa ka mamumuhat sa Gingharian sa Dios. Ipahilayo siya sa mga sakit ug mga ingon-anang butang samtang siya nagapanaw. Ug himoa siya nga usa ka dakung panalangin sa Imong Gingharian. Ug ginatugyan namo Kanimo kining gamay'ng batang babaye ingon nga paghalad, sa Ngalan ni Jesus Cristo. Amen.

Hiligugmaon gayud nga masuso!

28 Oh, ganahan gyud ko og gagmay'ng mga bata. Pero ako gayud. . . mahadlok ko kanunay nga basin mapiang sila, kabalo na mo. Gagmay baya kaayo sila. Ug bisan pa niana, gisultihan ako sa akong asawa, miingon, "Aba, mas lisud pa silang mapiang kaysa—kaysa—kaysa nako." Busa, oo, husto kana. Lagsik kaayo sila, kabalo na mo.

29 Ug karon, aduna ba'y masakiton nga gustong maiampo, usa—usa ka espesyal nga kahintang lamang nga igaampo o ingon niana, ug mahimo namong itanyag kaninyo? Sige, igsoong babaye, kung mahimo moduol ka lang dinhi ug motindog. Sige. Uh-huh. Kana'y usa ka. . .Gusto natong buhaton kining mga butanga, tungod nga basin medyo malangay kita og diyutay sa atong pang-Pasko nga mensahe, nga hinoon okey ra man. Sige, sir.

30 Karon, iduko nato ang atong mga ulo karon. Igsoong Neville, mahimo ba nga ubanan mo ako sa atubangan?

31 Langitnon namong Amahan, sa niining bisperas sa Pasko, kon diin ang dakung kapasayloan sa among mga sala ug balatian nahimugso kaniadto sa kalibutan, aron mahimong usa ka Halad para kanamo. Ginadala namo ang among igsoong babaye, sa Ngalan ni Jesus Cristo, nga, sa pagpandong namo og mga kamot diha kaniya, mahimo namo mismo ang gisulti Mong pagabuhaton. "Pagapandongan og mga kamot ang mga may sakit ug mangaayo sila." Ginabuhat namo kini sa Ngalan ni Jesus Cristo, alang sa iyang kaayohan. Amen.

(Tawaga si Igsoong Cauble. . .? . . .)

32 Oh, husto ba? Kumusta ka, igsoong babaye? Karon, karon, iduko nato pag-usab ang atong mga ulo.

33 Langitnon namong Amahan, samtang nagatindog kami dinhi sa Presensiya sa Makagagahum-sa-tanan, nagaampo para sa among igsoong babaye nga nakasinati og hitabong-dautan. Ug adunay butang nga nahitabo nga nakapabuta sa iyang mata. Apan Ikaw, Ginoo, sama sa Imong gisulti kang Moises, "Kinsa man ang naghimo sa mata sa tawo?" Ug adunay Usa lamang nga makatabang, ug kana'y mao ang gamhanang Jehovah, nga Magbubuhat.

34 Busa nagaampo kami, Langitnong Amahan, samtang ginatoohan namo kini sa among mga kasingkasing, ug ginadala namo siya nganha Kanimo. Ug ang among pagtoo, kami—nagaduol kami pinaagi sa pagtoo, paingon sa mahimayaon og bulawanong halaran sa Dios, kon diin ang dugoan nga Halad, si Cristo, napahimutang ibabaw sa halaran. Ug sa Basahon sa Isaias, sa ika-53 nga kapitulo ug sa ika-5 nga bersekulo, gikaingon, "Siya gisamaran tungod sa among mga kalapasan, napangos tungod sa among kasal-anan; ang silot sa among pakigdait diha sa ibabaw Niya, ug tungod sa Iyang mga labod kami nangaayo." Karon ginapahimutang namo ang

among pagtoo uban ang sa iyaha, diha sa Imong halaran, ug nagapangamuyo, sa Ngalan ni Jesus, nga kining pagkabuta mobiya na sa among igsoong babaye, ug aron siya makakita na, alang sa kadungganan ug kahimayaan sa Dios. Sa Ngalan ni Jesus Cristo. Amen.

Panalanginan ka sa Dios, igsoon.

³⁵ Igsoong Cauble. [Nagapakig-istorya si Igsoong Wallace Cauble kang Igsoong Branham—Ed.] Oh, oo. Paris Reidhead. Oo. Oo, sir. Um-hum, um-hum. Maayo.

³⁶ Karon magaampo kita para sa pagdihog sa ministerio sa atong Igsoong Cauble, nga moadto ug bisitahon ang usa ka higala nako. Kauban nako siya nga namuhat didto sa New York. Si Paris Reidhead, ang tawo nga miadto sa akong balay kaniadto aron modawat sa bautismo sa Espiritu Santo.

³⁷ Ug dili ba aduna man siya'y kahilambigitan sa Sudan Mission? [Nagaingon si Igsoong Cauble, “Oo. Siya ang direktor sa Africa. Nagapuyo sa New York, sa usa ka bahin didto sa New York, nagatrabaho sa niining dakung simbahan didto, aron makatabang.”—Ed.] Pagkanindot. Kung ingon-ana mobiya ka na diay sa Louisville. [“Oo.”] Oh, my! Dili gyud unta nato gustong mobiya si Igsoong Cauble, sa Louisville. Panalanginan ang imong kasingkasing, igsoon. My!

³⁸ Kanunay kong mahinumduman si Igsoong Cauble. Kining minahal nga igsoong lalaki, nga balaan sa Dios, mahinumduman ko pa ang unang pakighimamat ko kaniya. Nagdugo siya nga halos mamatay na. Ako—nadungog ko na ang ilado niyang ngalan taliwala sa mga kaigsoonan. Miadto ako didto. Adunay mga kaigsoonan nga atua pud sa ospital. Ako, usa ka kabus ra nga tawo nga sama kanako, naulaw ako nga mosulod, busa miluhod ako sa luyo sa Coca Cola, nga anaa sa pasilyo sa ospital ug nag-ampo alang kaniya ug mibalik na.

³⁹ Mitingog pag-usab ang telepono, ang ingon, “Wala man lagi ka miadto aron duawon si Igsoong Cauble.”

⁴⁰ Ug mao nga miadto ako didto. Aduna sila'y gioperahan sa iyang ilong, ug adunay gihiwa, nga butang nga migrabe na, ug nagdugo siya og ayo nga halos mamatay na. Miluhod ko didto ug nag-ampo. Sa gilayon mihunong kadto.

⁴¹ Langitnon namong Amahan, Imo siyang alagad. Ug karon molakaw na siya gikan kanamo, apan sa gihapon nagkahiusa kami, Ginoo. Ang among mga kasingkasing kanunay gayud nga magapitik, nagaampo ako, sama karon, nga nagatinabangay sa usa'g usa. Nagaampo ako Kanimo, Amahan, nga panalanginan kining, akong igsoon, samtang moadto siya didto aron tabangan ang Imong halangdon nga alagad, nga si Igsoong Paris Reidhead, nga interesado gayud sa bautismo sa Balaang Espiritu. Bisan unsa pa'y isulti sa tanang mga pundamentalista, ang ginatinguha gihapon niya mao ang Dios, bisan pa

man. Panalangini si Igsoong Cauble, ug panalangini sila nga magkauban sa ilang buluhaton alang Kanimo, Ginoo, sa ilang mga pagpaningkamot. Hinaut nga mamuhat sila nga magkauban mismo sama ni Pablo ug ni Silas kaniadto. Itugot kini, Ginoo.

⁴² Ihatag kaniya ang pagdihog sa Balaang Espiritu. Nangandoy siya, ug naningkamot, ug namuhat, ug nanglimbasog, nga makaplagan ang maong dapit kon diin mahimo Mo siya nga punon, Ginoo, ug ablihan ang dagkung mga butang alang kaniya. Ug hinaut nga kini na ang panahon, Ginoo, diin Imo siyang gibansay ug nga giampo kining taknaa, Ginoo, tungod kay ania na kami sa panahon sa kagabhion. Lig-ona ang iyang lawas, Ginoo. Nagkinahanglan siya og kusog. Hinaut nga ang gahum nga nagbanhaw kang Jesus Cristo gikan sa mga patay, magadala og kaayohan sa iyang lawas, ang makapabag-o nga gahum, og hinaut nga magasangyaw siya nga inubanan og gahum sa pagkabanhaw ni Jesus Cristo. Ginapanalanginan namo siya.

⁴³ Panalanginan ka sa Ginoo, Igsoong Cauble! Ipangumosta ako kang Igsoong Paris, ug nagalaum ako nga makita kamo sa dili madugay. Moadto ako sa gawas sa nasud, sa India. Panalanginan ka sa Dios.

Kumusta ka, igsoong babaye? Salamat, igsoong lalaki.

⁴⁴ Ginoong Jesus, samtang ginadala namo kining luoy'ng babaye, nga nakapandong ang among mga kamot diha kaniya, nga ginapaila ang among kaugalingon uban kaniya, sama sa maong halad, ingon nga nahibalo kami nga gisaad Mo kini, nagapangamuyo ako para sa iyang kaayohan sa Ngalan ni Jesus. Amen.

⁴⁵ Sa niining luoy'ng inahan nga nagatindog dinhi nga nagtikubo na ang abaga ug ubanon na ang buhok, nga nagapakita nga siya nakaandam na alang sa umaabot nga kalibutan. Dios, hinaut nga ang gahum nga nagbanhaw sa among Ginoong Jesus gikan sa lubnganan, samtang ginapandongan namo siya sa among mga kamot, nga ginapaila ang among kaugalingon uban kaniya ug kang Cristo, hinaut nga ang gahum nga nagbanhaw Kaniya gikan sa lubnganan magaayo sa iyang lawas, sa Ngalan ni Jesus.

Panalanginan ka sa Dios, igsoon kong babaye.

⁴⁶ Langitnong Amahan, samtang ginapandongan namo og mga kamot ang among igsoong babaye, usab, sa Ngalan ni Jesus Cristo, hinaut nga mamaayo na siya alang sa kahimayaan sa Dios. Amen.

⁴⁷ Maloloy-on nga Amahan, sa Ngalan ni Jesus Cristo, ginapandongan namo og mga kamot ang among igsoong babaye. Sa Ngalan ni Jesus Cristo, hinaut nga mamaayo na siya alang sa kahimayaan sa Dios. Amen.

Panalanginan ka sa Dios, igsoong babaye.

48 Langitnong Amahan, ginapandong namo ang among mga kamot nganhi sa among igsoong lalaki dinhi, sa Ngalan ni Ginoong Jesus Cristo, alang sa iyang kaayohan. Hinaut nga mamaayo na siya sa Ngalan ni Jesus.

49 Langitnon namong Amahan, ingon nga usa sa among mga igsoong babaye nga nagabiyahé gikan pa sa halayo, aron nga makatambong sa panagtigum, apan nagatindog siya karong buntaga, ug ginapaila namo ang among mga kaugalingon, Ginoo, diha sa Ebanghelyo, samtang nakapandong ang among mga kamot ibabaw sa usa'g usa ug diha kaniya. Hinaut nga makita kini sa Dios sa Langit, kon diin ginaingon kini, "Kung adunay duha o tulo nga nagkauyon sa yuta." Ania nagatindog kaming, tulo nga magkauban, Ginoo, sa Ngalan ni Jesus Cristo. Ayoha siya, Ginoo, sa Ngalan ni Jesus.

50 Sa samang paagi, Ginoo, ginapandong namo ang among mga kamot nganhi sa among igsoong babaye dinhi. Ug samtang nagakahiusa kami, sa Ngalan ni Jesus Cristo, hinaut nga mamaayo na siya.

51 Langitnong Amahan, nahisgotan niya ang maanindot nga Cristohanong pagkinabuhi. . . adunay kanser ang iyang asawa. Oh Dios, nagatindog siya alang sa iyang asawa. Si Cristo sàb ang nagatindog alang kaniya.

Karon, yawa, bumiya ka kaniya, sa Ngalan ni Jesus Cristo.

52 Toohi kini, igsoon. Usa kini ka poste nga giugbok dinhi mismo. Hinumdumi kini nga adlaw.

53 Langitnon namong Amahan, kini ang among igsoong babaye nga nagaduol kanamo, Ginoo. Ug ingon nga usa ka kinabuhi nga panig-ingnan, nagakinabuhi siya, ug nagaduol siya para sa iyang kaayohan. Ug kami uban sa among mga kasingkasing ug mga kamot nga nahiusa Kanimo, Ginoo, ginapangamuyo namo kini nga panalangin, sa Ngalan ni Jesus Cristo.

54 Ang among Igsoong babayeng Risert, Ginoo, nga Imong alagad nga babaye, mianhi siya niining panahon sa Pasko. Sa Ngalan ni Jesus, itugot nga mamaayo na siya. Amen.

55 Langitnong Amahan, ginadala namo kining hiligugmaon nga luoy'ng babaye karong buntaga, sa Ngalan ni Ginoong Jesus. Ginapandongan namo siya sa among mga kamot ug nagapangamuyo alang sa iyang kaayohan, sa Ngalan ni Jesus. Amen.

56 Langitnon namong Amahan, nagaduol kami ug ginapandongan namo og mga kamot ang among igsoong babaye, sa Ngalan, nianang labing balaan nga Ngalan, nga Jesus Cristo. Hinaut nga mamaayo na siya alang sa kahimayaan sa Dios.

57 Langitnon namong Amahan, samtang ginadala namo ang among igsoong babaye nganha Kanimo karong adlaw, ingon

nga usa—usa ka tropeyo sa Imong grasya, giubanan Mo gayud kini nga babaye. Daghan nang mga tuig ang milabay, adunay pipila na lang ka oras kaniadto aron mabuhi, giut-ot na sa kanser, ug nagkinabuhi gihapon siya alang sa Ginghamarian sa Dios. Ayoha siya karon, Ginoo, kung unsa man ang problema, sa Ngalan ni Jesus Cristo. Amen.

Panalanginan ka sa Dios.

⁵⁸ Langitnon namong Amahan, sama sa among igsoong babaye, nga usa ka tropeyo sa grasya sa Dios, usab, alaut kaniadto, makaluluoy'ng naadik sa droga, palahubog, ug karon nagatindog ingon nga usa na ka hiligugmaong babaye nga naayo na. Pagka-kahibulongan gayud nga kahimtang sa pagkaayo, Ginoo! Ug mao nga nagadilaab ang iyang kasingkasing para sa uban nga mga nanag-antus, tungod kay nasayod man siya nga adunay usa ka gamhanang Mananambal. Adunay tulo ka nagkalainlaing mga ngalan nga iyang gisulti karon, Amahan. Nagaampo ako ug ginapaila ang akong kaugalingon uban sa among igsoong lalaki dinhi, sa among pastor, ug—ug sa igsoong babaye, ug sa Ginoong Jesus. Ug hinaut nga, sa Iyang mahimayaong Ngalan, kanang tulo ka tawo mamaayo na alang sa Ginghamarian sa Dios. Amen.

Salamat, igsoon.

⁵⁹ Mahimayaong Amahan, ginapandongan namo karon og mga kamot ang among Igsoong Way. Adunay tulo ka butang nga iyang ginahangyo. Nasayod Ka sa mga niini, Ginoo. Ug nagatoo kami nga nahisulat na, ug nasayod nga ang Kasulatan nagaingon, “Ang tanang mga butang.” Ug busa ginaampo namo, Langitnong Amahan, nga kining, gihangyo niya, igapadayag ra nganha kaniya, sa Ngalan ni Jesus Cristo. Amen.

⁶⁰ Mahimayaong Amahan, ginapandongan namo og mga kamot ang among igsoong lalaki, sa Ngalan ni Ginoong Jesus, ug nagapangamuyo para sa iyang kaayohan, alang sa kahimayaan sa Dios. Itugot kini, Amahan, sa Ngalan ni Jesus. Amen.

⁶¹ Langitnong Amahan, nganhi sa among igsoong babaye, ginapandong namo ang among mga kamot, alang sa Ginghamarian sa Dios, sa Ngalan ni Jesus Cristo, aron tumanon ang gisulti Niya nga pagabuhaton. Hinaut nga mamaayo siya sa Ngalan ni Jesus. Amen.

Panalanginan ka, igsoon.

⁶² Amahan nga Dios, maingon man usab, sa among igsoong lalaki, ginapandong namo ang among mga kamot, sa Ngalan ni Jesus Cristo, nga ayohon Mo siya, alang sa Ginghamarian sa Dios. Amen.

Panalanginan ka sa Dios, igsoon ko.

Igsoong babayeng Arganbright.

63 Langitnong Amahan, nagaampo kami para kang Igsoong babayeng Arganbright, nga ayohon Mo siya. Itugot kini, Ginoo. Ang iyang hangyo, hinaut nga igahatag kini kaniya, Langitnon namong Amahan, sa Ngalan ni Jesus Cristo. Amen.

64 Ginoong Jesus, ginapandongan namo og mga kamot ang among igsoong lalaki, sa Ngalan ni Jesus Cristo, hinaut nga igahatag ang iyang ginahangyo.

Toohi kini, igsoon ko.

65 Langitnong Amahan, ginapandongan namo og mga kamot ang maong batang lalaki, sa Ngalan ni Jesus Cristo, ug hinaut nga, samtang nagatindog kami karong buntaga, pinaagi sa pagtoo, ginadala namo kini nga bata nganha Kanimo. Ug hinaut nga ang mga panalangin sa Dios, ang gahum ni Cristo nga nagapang-ayo, mapadayag diha sa iyang gamay'ng lawas, sa Ngalan ni Jesus. Amen.

66 Amahan nga Dios, sa niining hiligugmaon nga amahan nga nagdala kaniya, ginahangyo usab namo nga ipadayag Mo ang Imong gahum nga nagapang-ayo, sa Ngalan ni Jesus.

Panalanginan ka, igsoon ko.

67 Langitnong Amahan, samtang si Igsoong babayeng Peckinpugh, ang among halangdong igsoong babaye nga nanginahanglan, ug nagmaloloy-on gayud Ikaw diha kaniya, Ginoo. Nagaampo ako nga ang Imong nagapadayon nga mga panalangin magadagayday sa iyang kasingkasing. Ug ang tanang mga sakit ug kasubo nga nasinati niya, hinaut nga ang gahum ni Cristo magapasig-uli kaniya, Ginoo, sa gatus-ka-pilo, ug bug-os gayud siya nga pagaayohon, lakip ang iyang mga minahal sa kinabuhi, sa Ngalan ni Jesus. Amen.

Panalanginan ka.

68 Langitnong Amahan, ginapandongan namo og mga kamot ang among igsoong lalaki ug nagapangamuyo nga ang gahum ni Jesus Cristo magaaayo kaniya, pinaagi sa Ngalan niining Bata-nga-Cristo nga among ginasaulog niining panahona. Amen.

69 Maloloy-on nga Dios, samtang ginapandong namo ang among mga kamot nganhi sa among igsoong babaye, nga Imong alagad, sa Ngalan ni Jesus Cristo hinaut nga mamaayo siya alang sa Imong kahimayaan.

70 Ginoo, ginapandongan namo og mga kamot ang among igsoong babaye, sa Ngalan ni Jesus Cristo. Hinaut nga mamaayo siya. Amen.

71 Langitnong Amahan, ginapandongan namo og mga kamot ang among igsoong babaye dinhi, sa Ngalan ni Jesus Cristo. Hinaut nga ang gahum sa Dios magaaayo kaniya. Amen.

72 Ginoong Jesus, itugot sa among igsoong babaye ang iyang hangyo, samtang ginapangamuyo namo kini alang sa kahimayaan sa Dios, sa Ngalan ni Jesus.

73 Langitnon namong Amahan, nakita namo ang among igsoong babaye nga kauban gihapon namo, niining daghang mga katuigan. Nagapasalamat kami Kanimo tungod niini, Ginoo. Nagaampo kami nga Imong ihatag kaniya ang iyang ginahangyo, sa Ngalan ni Jesus.

Ginoong Dios . . .

74 Unsa? [Nagapakig-istorya ang igsoong babaye kang Igsoong Branham—Ed.] Ug ang Dios anaa-sa-tanang-dapit, sa ubang nasud, dinhi man, og sa tanang dapit. Ug nagatoo ka ba, ug buhaton sa Dios, karong buntaga, didto sa Norway, nga ayohon siya? [Nagapakig-istorya ang igsoong babaye kang Igsoong Branham.] Unsa? Ang imong anak nga babaye ug ang imong amahan, ug nagtinguha ka og pag-ampo para kanila, alang sa kaluwasan.

75 Ginoo, nakita Mo ang ubos nga babaye ug nasayod kami nga nasayod Ka sa iyang mga hangyo. Nadungog Mo ang iyang tingog. Giunsa Mo man pagkahibalo nga nagatindog siya dinhi? Ingon nga, walay bisan usa ka maya nga mahulog sa dalan nga wala Ka nahibalo niini. Ug kung ingon-ana nasayod ako nga nasayod Ka niining maong hangyo, busa ginatawag namo mismo kining mga butanga, sa Ngalan ni Jesus Cristo. Hinaut nga igahatag ang mga niini kaniya, pinaagi sa Ngalan ni Jesus Cristo.

76 Langitnong Amahan, among ginaampo kana, para sa iyang inahan nga tigulang na ug gikatakda nga operahan. Dios, tabangi intawon. Ug kung aduna pa ma'y unsa mang butang nga mahimo namo, Ginoo, isulti lang kini kanako o kang kinsa man, sa dili pa kining adlaw, aron mahupay ang among igsoon. Itugot kini, Amahan. Nagapangamuyo ako sa Ngalan ni Jesus. Amen.

77 Ginoo, ginapandongan namo og mga kamot ang among igsoong babaye. Sa Ngalan ni Jesus Cristo, hinaut nga ayohon Mo siya ug himoon siya nga mamaayo na. Amen.

78 [Nagaingon ang usa ka igsoong babaye, “Igsoong Branham, gusto kong motindog. Gusto kong moduol ka . . . ? . . .”—Ed.]

Hinaut nga itugot sa Dios sa Langit ang iyang hangyo. Sa Ngalan ni Jesus, ako nagaampo.

Panalanginan ka sa Dios, igsoong babaye. Ikaw si Igsoong Margaret. Oo. Sige.

79 Ginoong Jesus, nagaampo ako para sa among—among igsoong babaye, ang iyang bana nagatindog para kaniya. Nakigbisog gayud sila, ug gipadayag gayud Nimo ang Imong Kaugalingon nganha kanila ug gipakita ang Imong Kaugalingon nganha kanila, Dios! Mapasalamaton kaayo ako. Itugot, Ginoo, nga mamaayo na ang iyang asawa, ang among minahal nga igsoong babaye, sa Ngalan ni Jesus.

⁸⁰ Langitnong Amahan, kining hangyo nga ginapangamuyo niining igsoong lalaki, nasayod Ka sa tanan niini nga mga kahimtang, Ginoo. Nagaampo ako para sa Imong alagad. Dios, itugot, ug para sa kaayohan sa mga lawas nga iyang ginahisgotan. Karon, mas nadungog Mo kini nga mga hangyo kaysa kanako. Busa nagahangyo lamang ako, samtang bukas ang akong kasingkasing, sa Imong halaran, ug ginapahimutang ko ang akong pag-ampo uban ang sa akong igsoon dinhi, sa Ngalan ni Jesus Cristo, nga ang mga niini pagatubagon mismo. Amen.

⁸¹ Langitnong Amahan, ginapandongan namo og mga kamot ang among igsoong babaye para sa iyang hangyo. Hinaut nga igatugot kini diha kaniya sa Ngalan ni Jesus Cristo. Amen.

Panalanginan ka sa Dios, igsoong babaye.

⁸² Ginoo, ginapandongan namo og mga kamot ang among igsoong babaye, para sa iyang hangyo. Sa Ngalan ni Jesus Cristo, hinaut nga igatugot kini.

⁸³ Amahan nga Dios, sa among igsoon dinhi, ang iyang hangyo, hinaut nga igahatag kini kaniya, Ginoo. Nagapaningkamot siya sa pag-alagad Kanimo, sulod niining daghang mga katuigan. Bisan pa sa kalisud, nagpabilin gihapon siya nga nagabarug. Dios, hinaut nga makuptan niya ang sungay sa altar karong buntaga, nga ginabugsok ang poste dinhi sa kilid, “Mao na kini ang takna sa katumanan.” Itugot kini. Ug hinaut nga igahatag kini nga hangyo alang sa iyang asawa ug apo, sa Ngalan ni Jesus.

Panalanginan ka sa Dios, Igsoong Brewster. Toohi kini.

⁸⁴ Langitnon namong Amahan, kining gamay'ng inahan, nga nagatindog dinhi karong buntaga, mora'g nahimong inahan na sa kadaghanan. Karon nagaampo siya para sa iyang mga minahal sa kinabuhi, Ginoo. Gihangyo niya kana, ug kami'y. . . kaming tanan nagkahiusa mismo, nga ginapandong ang among kamot diha kaniya, ingon nga usa ka yunit, nga kami nagatoo niini. Ug samtang ang among mga kasingkasing anaa sa atubangan sa Imong halaran, ginapangamuyo namo kini nga hangyo nga iyang ginahangyo, nga igatugot unta sa Ngalan ni Jesus. Amen!

⁸⁵ Dios, nasayod Ka usab sa mga tawo nga iyang ginarepresentar, ang matag usa nga anaa sa iyang kasingkasing niining orasa. Ug gipahimutang namo ang among kaugalingon uban kaniya, Ginoo. Sa Ngalan ni Jesus Cristo, hinaut nga igatugot ang iyang hangyo. Amen.

⁸⁶ Oh Dios, kaila namo si Igsoong Hattie. Ginaampo namo, Dios, samtang ginapandongan namo siya sa among mga kamot, itugot nga mokunsad kaniya ang Espiritu Santo, ug magpadayag sa iyang kasingkasing. Ginahunahuna namo ang iyang minahal nga mga anak nga lalaki, silang duha. Akong mahinumduman nga atua ako sulod niadto nga lawak niadtong adlaw, sa usa ka gamay, yanong panimalay. Miingon Ka, “Sultihi siya

nga pangayoon ang unsa man nga gusto niya, dayon isulti lang ang Pulong.” Nangayo gyud siya. Dios, nasayod ako nga nagkahingawa Ka sa niining mga tawo. Busa nagaampo ako, samtang ginapandongan ko siya og mga kamot, sa Ngalan ni Jesus Cristo, hinaut nga igatugot ang iyang hangyo.

⁸⁷ Ginoong Dios, samtang ginapandongan namo og mga kamot ang among luoy’ng igsoong babaye, nga nagabiyahe latas sa niining madanlog nga mga dalan ug uban pa, sa pagpaningkamot nga makaanhi dinhi. Nasayod Ka sa tanantan bahin niini. Nagaampo ako para kaniya, Ginoo, samtang ginapandongan ko siya sa akong mga kamot. Sa Ngalan ni Jesus Cristo, hinaut nga madawat niya ang iyang gipangayo. Amen.

⁸⁸ Langitnon namong Amahan, samtang kining minahal nga igsoong lalaki. . .kung unsa nga determinado gyud siya kaniadto, Ginoo, nagapus siya kaniadto sa mga sigarilyo ug mga ingon-anang butang. Nagpa-eskedyul siya og usa ka pagpakighinabi, ug naghulat nga naghulat. Ug walay bisan unsa nga Imong ginasulti kanamo. Nagpa-eskedyul na pud siya. May ginahulat Ka ug ginahulat, ug wala gyu’y bisan unsa nga Imong ginasulti kanamo. Ug sa katapusan, usa niana ka buntag, samtang naglingkod ko didto, ania kini nga miabot. Tapos na kadtong tanan niadtong tungora. Nagapasalamat kami Kanimo, Ginoo. Matinud-anon Ka. Wala gayud sukad nagakapakyas ang Imong mga Pulong. Ug ang ingon Niya, “Sila nga nagahulat sa Ginoo magabag-o sa ilang kusog.” Karon, nagaduol siya nga adunay tulo ka hangyo karong buntaga, Ginoo. Ug nagatindog kami ingon nga tutulo, dala ang saad sa—sa tutulo ka katungdanan nga gihimo sa usa ra ka Dios. Sa Ngalan nianang usa ka tinuod ug buhi nga Dios, si Jesus Cristo, hinaut nga igahatag kaniya ang iyang hangyo. Amen.

Ang Dios magapanalangin kanimo, igsoon.

Ginoo. . .

Oh, grabe! [Nagapakig-istorya ang usa ka igsoong babaye kang Igsoong Branham—Ed.]

⁸⁹ Ginoo, nadungog Mo kadtong mga hangyo. Nasayod Ka kung unsaon pagtubag ang mga niini, Ginoo. Busa ginapandongan lang namo og mga kamot ang among Igsoong babayeng Baker, sa Ngalan ni Jesus Cristo, ginahalad namo ang among hangyo lakip ang sa iyaha, alang sa maong kaayohan. Amen.

Panalanginan ka, igsoon kong babaye.

⁹⁰ [Nagaingon si Igsoong Neville, “Aduna pa ba’y gustong moduol, siged duol na karon.”—Ed.]

⁹¹ Langitnong Amahan, samtang ginapandongan ko og mga kamot kining buotang igsoong lalaki, nga daw sa hulagway mismo sa may maayong panglawas karon, pero usahay malimbongon kana. Busa nagaampo ako nga itugot

Mo unta ang iyang hangyo, kung unsa man ang anaa sa iyang kasingkasing. Ihatag kaniya kung unsay iyang gipangayo, sa Ngalan ni Jesus. Amen.

⁹² Langitnong Amahan, ginapandongan namo og mga kamot ang among igsoong babaye ug ginapangamuyo, sa Ngalan ni Ginoong Jesus, nga igahatag Mo unta kaniya ang iyang hangyo alang sa Imong kahimayaan. Amen.

⁹³ Ginoong Jesus, ginapandongan namo og mga kamot ang among igsoong lalaki ug nagapangamuyo para sa iyang hangyo. Ginapahibalo lang namo kini, Ginoo, samtang ginapandongan namo siya og mga kamot. Ginahilambigit namo ang among kaugalingon, ug sa niini nga panaghiusa nagaampo kami sa Ngalan ni Jesus. Amen.

Panalanginan ka sa Dios, igsoon kong lalaki.

⁹⁴ Amahan nga Dios, para sa among igsoong babaye usab, nagapangamuyo pud kami. Sa Ngalan ni Jesus Cristo, hinaut nga maangkon niya ang iyang hangyo.

Panalanginan ka, igsoon kong babaye.

⁹⁵ Dios, ingon nga ang among minahal nga igsoong lalaki hapit gyud mamatay niadtong miaging adlaw, apan dili Ka pa andam para kaniya. Busa nagaampo ako, Dios, nga Imong ihatag kaniya ang iyang hangyo, sa Ngalan ni Jesus Cristo. Amen.

Kabalo na mo kung unsaon pagtoo niana.

⁹⁶ Langitnon namong Amahan, samtang nagaduol ang among luoy'ng, ginanerbiyos nga igsoong babaye, nanghibalo, Ginoo, nga daghan na ang iyang mga pag-antus. Apan gisaad Mo man nga, “Daghan ang mga kagul-anan sa matarung, apan ang Dios magaluwas kaniya gikan kanilang tanan.” Bug-os gayud siya nga nagkinahanglan og kaluwasan, Ginoo. Ginapandongan namo siya og mga kamot ug ginahinginlan ang kining dautan. Ginoo, sa Imong bulawanong halaran, hinaut nga modagayday kaniya ang gahum sa Dios ug ayohon na siya. . . ? . . .

⁹⁷ Bueno. Magpabilin lang kamong tanan. Ikaw ba ang nakapuwesto dinha sa luyo kaganina pa? Diay. Wala man gud ta ka makita. Oh, ikaw, *dinhi* dapit. Mao diay. Ania ang usa ka lalaki nga ang tawag, ang tawag nila kaniya, “Miner.” Mao kana ang iyang ngalan. Apan mao kini ang usa ka higayon nga si Miner usa ka major. [Nagaingon si Igsoong Miner Arganbright, “Mao ba?”—Ed.] Isulti lang ang bisan unsa, unsa man nga gusto nimo.

⁹⁸ Si Igsoong Miner Arganbright usa siya sa—sa Full Gospel Business Men, usa sa . . . mitabang siya sa pagtukod niining dakung kalihokan, nga ginapaningkamotan natong mamuhat nga magkauban aron maila sa tanang mga tawo, bisan unsa pa ang ilang gipamiyembrohan ug denominasyon, nga kitang tanan managsoon ra diha kang Cristo.

⁹⁹ Aduna siya’y gisulti nga usa ka gamay’ng butang, niadtong miaging adlaw. Nagsulat siya sa usa ka Senador o sa kung kinsa man nga hataas didto. Bug-os gayud nga halangdon. Ug miingon ko, “Gusto ko nga isulat mo kadto. Gusto ko nga moadto ka sa simbahan ug isulti kadto.”

Ang ingon, “Nasulti ko na kadto.”

Mao nga narekord nato kadto sa teyp dinhi. Ug gusto kong makuha kadto gikan sa teyp, mga igsoon. Igsoong Jim, kabalo ko nga nadungog mo ako dinha, sulod sa lawak. Gusto kong makuha kadto. Usa gayud kadto ka tinuod nga buhat sa—sa diplomasya, nga nadugang niadto. Kita n’yo? Bueno.

¹⁰⁰ Isulti lang ang gusto mo, Igsoong Arganbright. [Blangko nga bahin sa teyp—Ed.] Amen. Amen.

¹⁰¹ [Nagaingon si Igsoong Arganbright, “Palingkora lang ko dinha. Sige, dinha lang.”—Ed.]

¹⁰² Tinuod gayud! Amen. Tinuod gayud! Ang pakigdait nagaabot ug nagakawala, ug ang mga kalipayan, ug basta na lang nagakahanaw, apan ang kalipay nagapabilin mismo.

¹⁰³ Bueno, kini’y usa—kini’y usa—usa ka dili-maayo nga adlaw sa gawas, og maayo nga adlaw sa sulod. Ug, kabalo mo, duna ko’y nahimamat nga usa ka lalaki, o may usa ka lalaki nga nagsugilon kanako nga nakatagbo kono siya og usa ka lalaki bag-ohay lang, ug ang ingon niya nga nagreklamo kono kining maong lalaki. “Oh,” ang ingon, “pagkangil-ad niining adlaw.” Ang ingon niya nagaulan kono ug wala gyud moundang.

Ingon niya, “Maanindot man kini nga adlaw.”

¹⁰⁴ Ug miingon kadtong lalaki, “Bueno, sa unsa mang hinungdan nga masulti mo nga maanindot kini nga adlaw?”

¹⁰⁵ Ingon niya, “Sultihan nako ka. Gisultihan man gud ko sa doktor usa na ka tuig ang milabay nga aduna na lang kono ko’y usa ka semana para mabuhi.” Ingon pa, “Mao nga ang matag adlaw, bueno, usa gyud ka maanindot nga adlaw.” Oo.

¹⁰⁶ Bueno husto kana, kini—kini’y maanindot nga adlaw, busa kitang tanan. . . Ang. . . sama sa gisulti sa igsoong lalaki, “Kitang tanan kaniadto nahinukman sa silot sa kamatayon.” Husto kana, mamatay na unta ug mahiadto sa kasakitan. Apan karon usa gayud ka maanindot nga adlaw. Ingon nga buhi kita diha kang Cristo ug dili na mahimo nga mamatay pa. Tapus na ang tanan, nakita n’yo. Kita anaa na gayud kang Cristo. Karon atong. . .

¹⁰⁷ Karon, sa tabernakulo, Igsoong Arganbright, kasagaran dili ra ko nagadali. Busa kung gutomon kamo inig ting-panihapon na, nan puede kamong mogawas kadali. . . Gibati gyud ko og kakapoy karong buntaga mao nga kinahanglan kong mamulong og diyutay aron mapabiling alisto ang akong kaugalingon

hangtud nga mahimo na nako...mokunsad na kanako ang Espiritu sa Ginoo.

¹⁰⁸ Busa iduko nato ang atong mga ulo karon ug mag-ampo sa dili pa nato basahon ang Pulong. Pila kaha ka mga hangyo para sa uban pang mga butang ang aduna kamo nga tingali wala naiampo kaganina, ipahibalo lang ninyo kini samtang ginapataas ninyo ang inyong mga kamot. Karon atong—manindog kita karong buntaga samtang magaampo kita. Mausab hinoon ang postura sa inyong lawas ug tingali makatabang kana og diyutay. Ug pagkahuman sa pag-ampo, gusto ko nga magpabilin sa kamo sa pagtindog sa makadiyut hangtud nga akong basahon ang Pulong. Sa hunahuna ko maayo gyud nga motindog nga may pagtahud samtang ginabasa nato ang Pulong sa Dios.

¹⁰⁹ Langitnon namong Amahan, nagaduol kami nga mapainubsanon gayud sumala sa nahibaloan namo kung unsaon sa pagduol, nga may mga kasingkasing nga nahaw-asan na sa tanang mga tinguha nga iya sa kalibutan o sa mga kalipayan niini. Ug sama sa gikutlo sa among igsoon o gipahayag kanamo, “Kalipay, ang kalipay sa Ginoo mao ang among kusog.” Ug nagaduol kami nga may malipayong kasingkasing, nga aduna kami niining pribilihiyo nga makaduol sa Imong Presensiya, aron pangayoon ang unsa man nga hangyo nga ginatinguha namo. Ug nagaabot ang kalipay pag nagatutok kami sa Pulong. Ug gikasaaran kami nga kung toohan namo Kini, igahatag kini kanamo. Unsa pa ba’y makapalipay sa kasingkasing sa tawo nga nagapitik, nga labaw pa kaysa mahibaloan nga ang walay-kamatayon, Eternal nga Dios ang naghatag og ingon niana nga saad?

¹¹⁰ Karon pasayloa kami, Ginoo. Ug kung nakasala man kami o nakabuhat og unsa mang butang nga wala makapahimuot Kanimo, nga sa dili pa namo pangayoon kining mga butanga... Kay nasayod kami nga nahisulat na, “Kung ang among mga kasingkasing wala magasaway kanamo, madawat namo ang among ginahangyo.” Apan karon pasayloa kami sa tanan namong nabuhat. Tan-awa kami, Ginoo, nga may kalooy ug may kahingawa. Tan-awa kung unsa kami ka makaluluoy’ng panon, Ginoo. Mga luoy’ng may-kamatayon, nga nagakamang dinhi sa yuta, ug nagalatagaw lang dinhi niining makakasala nga dapit, apan sa kinahiladman sa among kasingkasing nasayod kami nga adunay Usa nga moabot sa umaabot nga adlaw nga magpakayab kanamo gikan niini nga dapit ngadto sa mas maayo nga dapit, ug nagakalipay kami tungod niini.

¹¹¹ Ug nagaampo ako, Dios, alang sa matag hangyo. Nasayod Ka kung unsa ang anaa sa luyo nianang mga kamot nga gipataas. Itugot kini kanila, Ginoo. Nagaampo usab ako para sa akong kaugalingon, alang sa kusog karong buntaga, alang—alang sa tingog aron makatabang ug aron maiwali ang Maayong Balita.

Ug ginapangamuyo namo nga panalanginan Mo kaming tanan nga magkauban mismo sa niining ginasaulog namo, ang panahon sa Pasko. Ginoo, hinaut nga makaplagan namo ang tinuod nga Espiritu sa Pasko, ug hinaut nga magpabilin Kini kanamo hangtud sa kahangturan. Kay amo kining ginapangamuyo sa Ngalan ni Jesus ug alang Kaniya. Amen.

¹¹² Karon, kung mahimo tumindog lang ùsa kamo sa makadiyut, gusto kong magbasa karong buntaga gikan sa Basahon ni Miqueas, para sa usa ka bahin; ug para sa usa pa, gikan sa Mga Hebreohanon, sa ika-12 nga kapitulo sa Mga Hebreohanon, para sa . . . aron mokuha og diyutay'ng konteksto sa kung unsay gusto kong hisgotan karong buntaga para sa atong pang-Pasko nga mensahe. Mga Hebreohanon 12:25, kini. Medyo gikinahanglan kong magdali kaganinang buntag sa dihang mibangon ako, ug wala ko napahimutang ang tanan sa eksaktong pagkahan-ay nga gusto ko, o sa gusto kong pagkahan-ay, diay. Magsugod ko sa ika-2 nga bersekulo sa Miqueas 1.

Pamati, . . . kamong mga katawhan; patalinghug, Oh yuta, ug ang tanan nga anaa niana: ug tugoti ang Ginoong Dios nga mahimong saksi batok kaninyo, ang Ginoo gikan sa Iyang balaan nga templo.

Kay, ania karon, ang GINOONG nagagula gikan sa iyang dapit, ug manaug, ug magatamak sa tanang . . . mga dapit sa yuta.

Ug ang mga bukid pagatunawon sa ilalum niya, ug ang mga walog pagabulagon, ug sama sa talo sa atubangan sa kalayo, ug ingon sa katubigan nga igabubo sa kimba nga dapit.

¹¹³ Ug sa Mga Hebreohanon, sa ika-12 nga kapitulo ug sa ika-25 nga bersekulo, mabasa nato kini.

Magmatngon kamo nga dili ninyo igasalikway siya nga mao ang nagasulti. Kay kon sila managpakaikyas . . . Kay kon wala man gani sila managpakaikyas nga misalikway kaniya nga nagpahamatngon kanila dinhi sa yuta, unsa ka labi pang dili kita makaikyas, kon kita magasalikway kaniya nga nagapahamatngon kanato gikan sa langit:

¹¹⁴ Karon, Ginoong Dios, idugang ang Imong mga panalangin sa pagbasa sa Imong Pulong, ug ihatag sa matag usa kanamo karong adlaw ang—ang butang nga gusto Mong masayran namo, aron mobiya kami dinhi ug mabati namo nga gikan kami sa Imong Presensiya, ug nga mopauli nga adunay usa—usa ka bag-ong panan-aw ug adunay mas labaw pang panabot, ug adunay labaw pa nga determinasyon kaysa niadtong pagsulod namo dinhi niining bilding. Kay amo kining ginapangamuyo sa Ngalan ni Jesus. Amen.

Makalingkod na kamo.

¹¹⁵ Karon, walay pagduhaduha, nga kung nadungog ko kanang teksto nga gibasa para sa usa ka pang-Pasko nga mensahe, makaingon gyud ko, “Karon dili ba kana usa ka talagsaon nga pang-Pasko nga pagbasa?” Ang . . . Ang katuyoan kung nganong gibuhat ko kini, mao’y aron magdala sa iglesia og usa ka butang nga tingali medyo lahi, tungod kay sa radyo sa tibuok Pasko inyong madungog ang pamilyar nga karaang sugilanon, nga balik-balik na, mahitungod sa maalamon nga mga lalaki nga naggikan sa Sidlakan ug nakaplagnan ang bata nga Cristo, ug ang pagsimba sa mga magbalantay, ug ang pagpakita sa Bitoon, ug kining tanan nga mga pang-Pasko nga sugilanon nga naglangkob sa pang-relihiyon natong tinooan sa karong panahon. Ug okey ra man kining tanan, ako—mapasalamaton ako para niana. Apan nahunahuna ko sa simbahan karong buntaga . . . Ug tingali ang atong pastor, tingali unyang gabii o sa sunod Domingo magadala ko og mensahe mahitungod niana. Ug mao nga nahunahuna ko nga magpahayag sa mga tawo og usa—usa ka lahi nga panan-aw . . . mahitungod sa Pasko, ug mao nga akong . . . Gipili ko kini nga teksto. Karon, pipila lang ka mga pulong.

¹¹⁶ Ug karon nakita nako nga nagpulihay kamo og mga puwesto, may uban nga nagatindog, may uban pud nga nagalingkod. Ug kana’y—maayo kana. Ug sa dili madugay magkaaduna ra kita og lugar aron kita . . . Dili, pasayloa ko nga dili nato puedeng pun-on kining mga pasilyo, tungod kay wala man ta gitugotan sa hepe sa bombero nga buhaton kana. Pero sa dili madugay magkaaduna na kita og diyutay’ng dugang nga espasyo, kon itugot sa Ginoo. Ngani gisugdan na nila kini, ug—ug sa labing dali nga panahon ato nang mapatukod kini, ug mahimong lahi na gyud ang hitsura sa kinatibuk-an pag-abot sa gamitong materyales sa lugar. Wala na gayu’y halos makita sa daang tabernakulo. Kini mahimong . . . stained glass na ang mahimong mga bintana, brick veneer pud ang anaa sa palibot niini. Magkaaduna og . . . Mahimong lahi na gayud. Pero ang daang bilding magpabilin gihapon dinhi, tungod kay aduna kita’y katuyoan para niana, kita n’yo. “Pasagdan nga magpabilin ang mga daang bungbong,” kita n’yo. Ug pinturahan nato kini og utro ug butangan og bato ang palibot niini, ug kung unsa pa, pero magpabilin kini nga mao ra gihapon.

¹¹⁷ Karon, sa Pasko. Ako—ako mismo nanghinaut nga ang mga tawo, niining kalibutana makasabot unta, kung unsa gayud ang Pasko. Karon, ang gigikanan sa pulong nga *Christmas* mora ba og—og usa ka panulihong Katoliko. Nagakahulogan kini og “ni Cristo . . .” *C-h-r-i-s-t-m-a-s*, kita n’yo, “misa ni Cristo,” kita n’yo. Gitukod kini o gisugdan sa iglesiang Romano kaniadto. Ug si Cristo wala man gyud natawo sa ikabaynte-singko nga adlaw sa Disyembre sama kanako. Uh-huh. Usa lamang kini ka bug-os nga katipun-ogan sa dogma. Ingon niana lang. “Ang

tibuok kalibutan,” sama sa giingon sa propeta, “nahimong mora’g ginana na nga samad.” Mao gyud. Wala gayu’y unsa man nga limpyo bisan asa. Ang matag okasyon ginaduso na sa . . . Aba, si Santa Claus na ang gipuli sa lugar sa Pasko, sa maong pagkahimugso diha sa pasungan. Napulihan na sa rabbit ug sa manok ug sa bag-ong kalo ang mismong pagkabanhaw. Ug asa na man makita ang Dios sa tanan niini? Kita n’yo? Ang hinungdan niini mao’y tungod nga, ang tawo, nahimong maka-komersyo na.

118 Aba, nagsugod na gani sila sa pagpamalit og pang-Pasko nga regalo mga pila na ka bulan ang milabay, ug kini walay lain kondili usa mismo ka paganong kinaiyahan! Wala gayu’y unsa man mahitungod niini nga diosnon. Oh, moingon sila, “Manghatag kono og mga regalo, sama sa maalamon nga mga lalaki.” Usa lamang kana ka—usa ka hamugaway’ng pasumangil sa yawa. Kung gusto n’yong maghatag og usa ka butang, ang kinabuhi n’yo mismo ang ihatag ngadto kang Cristo. Ayaw ninyo ihatag kang bisan kinsa, ihatag hinoon ngadto Kaniya. Mao man kana ang Iyang gipakamatyan. Mao kana ang Iyang katuyoan sa pag-anhi. Kita n’yo?

119 Pero miabot sa punto nga kini—kini’y—kini’y usa na ka tunglo sa gagmay’ng mga bata. Adunay gamay’ng bata sa silingan nga daghan ang nadawat, ug ang usa pud nga gamay’ng bata sa silingan wala man lang og bisan unsa, ug molantaw na lang intawon sila. Ug ang—ang maong tibuok butang bug-os gayud nga sayup. Kana lang. Ug ang mga negosyante nagapataas og presyo sa ilang mga baligya sa niining mga lugara. Sila . . . Aba, miadto ang akong asawa aron mopalit og regalo para sa pipila ka gagmay’ng mga bata, ug mga tulo na ka semana ang milabay, miingon, “Oh, nahalin na gyud tanan. Hurot gyud tanan. Doble gani ang among gi-order nga mga baligya karong tuiga, pero nahalin na man gud tanan.” Tulo o upat pa lang ka semana sa wala pa ang panahon para magsugod nga mamalit. Oh, nahimo gayud nga pagkadakung komersyo na lang!

120 Ug, bisan pa nianang tanan, nasayod ba mo kung sa unsang paagi nagsugod ang Pasko, kining ginatawag nato nga Christmas, “misa ni Cristo”? Ania ang estorya bahin niini, usa lang ka hamubong sinulat ang akong gisulat dinhi sa usa ka panid. Bag-o ko lang nga makumpleto niadtong miaging tuig, sa wala ko pa gihisgotan ang *Pito Ka Kapannahon Sa Iglesia*, gitudlo ko na ang mga niini dinhi, Gihisgotan ko ang *Nicaea Council*, ug ang *Pre-Nicaea Council*, ug ang *Post-Nicaea Council*, ug *Nicene Fathers*, ug ang *Two Babylons* ni Hislop ug *Foxe’s Book of Martyrs*, ug tanan na, tungod kay nadungog kong gikutlo kini sa mga ministro. Mao nga gusto ko mismo nga mabasa kini, aron makita, aron nga akong—nahibalo na ako sa dihang basahon ko kini o hisgotan ngadto sa mga kaigsoonan, tungod kay papanubagon man ako sa Dios sa Adlaw sa Paghukom

sa kung unsay akong ginasulti ngadto sa mga tawo. Busa, kinahanglan dili lang nga isulti nako kung unsay gisulti ni kinsa man mahitungod sa nabasa nila, gusto ko mismong basahon kini, kita n'yo, ug hibaloon.

¹²¹ Bueno, sa tinuod lang, ang Pasko, si Cristo, nagatoo ko ug halos makapamatuod. . . Sama sa pagkabanhaw nga mapamatud-an pinaagi sa pagtan-aw sa Magbubuhay, kung giunsa Niya pagbuhay kining tanan nga katanuman, ug kung unsa nga kinahanglan ngs mamatay ang tanan nga nabuhay na ang Iyang katuyoan, ug, kung mamatay kini, mabuhi kini pag-usab tungod kay aduna kini og kinabuhing wabay katapusan. Apan ang bugtong paagi aron mabuhi kini pag-usab, mao ang usa ka binhi nga may kinabuhi. Kita n'yo? Karon, ginapahayag sa Dios ang Iyang Kaugalingon diha niana nga binuhay, ug ginapakita niana nga ang tanang mga paganong diosdios ug mga ingon-anang butang nga aduna kita dili gyud husto. Kita n'yo, sila'y mga pilosopiya ug mga imahinasyon lamang. Apan ang—ang Usa Nga nagbuhay sa Langit ug yuta nagapadayag sa Iyang Kaugalingon pinaagi sa Iyang mga binuhay, kung unsa Siya sa Iyang programa. Ug dayon kung. . .

¹²² Napamalandongan ba ninyo, sa dihang natawo si Cristo, nga ang Anak sa Dios, kung ngano nga natawo Siya sa pasungan, sa usa ka kamalig, ug naghigda sa usa ka pasungan? Tungod kay usa man Siya ka Cordero. Dili mahimong mahimugso sulod sa mga balay, ang mga karnero wala man ginapanganak diha sa mga balay. Ug dayon namatikdan ba ninyo sa dihang gidala nila Siya didto sa Kalbaryo, ug kung unsa nga dili Siya arang makaikyas. Gipas-an Niya kadtong krus nga gipahimutang Kaniya. Gibunalan Siya hangtud nga nagdugo ang Iyang likod. Ug, bisan pa niana gipangunahan nila Siya, gipangunahan nila ang Cordero paingon sa ihawanan. Kita n'yo? Usa man gud Siya ka Cordero. Bueno, ug kung ang tanan niining mga pagpamatuod sa kinaiyahan, sa kung unsa Siya. . . Kanus-a man ginapanganak ang mga karnero, sa Disyembre ba o Abril? Sigurado. Kita n'yo, binuang gayud, kita n'yo, nga hunahunaon ang ingon nianang butang.

¹²³ Gibuhay kini sa iglesiya Romano Katoliko sa wala pa kini nahimong iglesiya Katoliko sa Roma. Niadtong mga A.D. 606, mga ingon-ana, o 306, diyas. Karon, nahibaloan nato nga gisimba sa mga paganong Romano si Jupiter, nga mao ang diosdios-nga-adlaw; ug gisimba nila si Astarte, nga mao ang diosdios-nga-bulan, o dili kaha ang inahan sa. . . ang—ang inahan kono sa langit. Bueno, kon isaysay og ayo, ang ingon nila nga si Astarte kono, o ang maong dios-dios, nga inahan sa langit wala na, ug gireplektar na kono ang iyang kaugalingon diha kang Maria. Busa nagpabilin gihapon kini nga pagsimba-sa-diosdios, nga ginahilambigit ang Cristianismo sa pagsimba-sa-diosdios.

¹²⁴ Dayon usab, ug miuyon sila, o gisimba ug gipasidunggan

ang adlaw'ng natawhan sa ilang diosdios-nga-adlaw, nga mao si Jupiter. Mao kadto ang panahon nga ang adlaw gikan sa uno sa Disyembre hangtud sa ikabaynte-singko sa Disyembre, wala kini mausab, ginasubay ang capricorn niini. Ug, lain pa'y ako, aduna ko'y nakuha nga artikulo gikan sa mantalaan nga gusto kong basahon kaninyo sa laing higayon, nga makapakurat gayud kaninyo. Ginahisgotan man ninyo ang mahitungod sa kung unsay nahitabo didto sa suba niadtong adlaw, Gusto kong ipakita kaninyo ang nadiskobrehan didto sa Jerusalem aron panghimatud-an kana, pipila pa lang ka semana ang milabay, gikan sa usa ka mantalaan. May usa ka butang nga ilang nakaplagan sa Jerusalem pipila pa lang ka semana ang milabay, nga siguradong magpamatuod niadtong Manulonda nga nagpakita dinhi niadto mismong higayona ug gipadala ang maong ministerio. Oo. Kita n'yo? Bueno, wala gyud ko mahibalo niini hangtud niadtong pipila pa lang ka semana ang milabay, ug ania na kini sa mantalaan.

¹²⁵ Karon matikdi sa dihang gisubay kana, kana—anaa kana didto, kita n'yo. Bueno, pagkahuman sa ikabaynte-uno sa Disyembre, hinay-hinay nga nagkamubo nga nagkamubo ang matag adlaw, o nagkadugay og diyutay kada adlaw, hangtud nga miabot ang Hulyo. Pagkahuman hinay-hinay na usab kini nga nagkamubo hangtud nga mitakdo. . . Ug mao na kadto ang panahon sa pagpahulay. Ug ang ingon sa mga paganong Romano nga mao kono kadto ang adlaw'ng natawhan sa diosdios-nga-adlaw. Sugod sa uno sa Disyembre, o ikabaynte-uno sa Disyembre hangtud sa ikabaynte-singko sa Disyembre, nga nagapahigayon sila og—og Romanong sirkus, may mga lumba sa mga karwahe ug uban pa nga ginapahigayon, niadtong panahona. Bueno, niadtong panahona, ang mga Cristohanon o ang mga Romanong Cristohanon, gidugang nila ang ilang dogma aron makuha ang duha ka dapig, ang sa pagano ug sa Cristohanon, ang ingon nila, “Kung kini ang adlaw'ng natawhan sa diosdios-nga-adlaw, himoon na lang nato kini nga adlaw'ng natawhan usab sa Anak sa Dios.” Mao kana ang inyong ikabaynte-singko nga adlaw sa Disyembre para sa inyong misa, misa ni Cristo. Oh, grabe kaayo nga butang! Kita n'yo?

¹²⁶ Karon, aron mahilambigit. . .Aba, moingon mo, “Dili ba puede ang uban pang adlaw?” Puede man, pero gibuhat kadto aron ihilambigit si Cristo sa pagano! Ang mismong butang nga gianhian Niya aron wagtangon, gihilambigit na hinoon nila Siya niini pag-usab. Kita n'yo? Mao kana ang butang nga sayup. Ug si Santa Claus, nga usa ka tigulang nga lalaki sa Germany, nga ginganlan og Kris Kringle, nga nagalibot aron manghatag og mga regalo sa mga bata sa adlaw mismo sa misa ni Cristo, usa siya ka Katoliko ug gihimo nila siyang usa ka santos, busa karon San Nicolas na. Kita n'yo? Mas maayo siguro nga akong. . . Ilang. . .Kana, hinoon kabalo na man mo niana. Kita n'yo,

nahisgotan na nato ang mga niini diha sa *Mga Kapanahonan Sa Iglesia*.

¹²⁷ Apan karong buntaga, ang gusto kong isulti mao kini, nga, sa niining umaabot nga adlaw sa Pasko ang kahimtang sa kalibutan walay pag-usbaw kumpara niadtong dise-nuebe o baynte ka gatus ka tuig ang milabay kaniadtong miabot si Cristo. Walay kalahian. Mao ra sa gihapon ang kahimtang sa kung unsa kini kaniadto, ang sa karon. Sila...Kung maghimo man ako og konklusyon gikan sa...o usa ka teksto gikan sa kung unsay akong igasulti, kini mao'y: *Ang Pagkalumpag Sa Kalibutan*.

¹²⁸ Kaniadtong miabot si Cristo sa Pasko, dise-nuebe na ka gatus ka tuig ang milabay, nagakalumpag na man ang kalibutan, ang tanan-tanan midangat na sa kahugawan. Nahimo nang mahugaw ang relihiyosong kalibutan. Ang Romanhong kalibutan, sa moralidad, anaa na sa pinakaubos nga kahimtang niini. Oh, grabe na ang imoralidad sa kalibutan! Gisalikway na sa mga Judio ang ilang Dios ug gisaulog ang ilang sagrado og seryoso nga kapistahan ug gihimo kadto nga usa ka pang-seremonya nga tradisyon. Mao nga gibiyaan sila sa Dios. Ug nasayod sila nga aduna gyu'y butang nga siguradong mahitabo, kabalo mismo ang tibuok kalibutan, tungod kay, aron mapapabilin kini. Nagakalumpag na kini. Ug ang *butang* para mapapabilin kini nga dili malumpag, ang matag nasud sa kaugalingon nilang pamaagi nangita og usa ka butang o usa ka tawo nga moabot para mapapabilin kini nga dili malumpag.

¹²⁹ Kung dili ba ingon-ana ang hulagway sa karong panahon, nan wala na ko kabalo sa kalibutan. Nagapangita kini og usa ka butang nga magpapabilin niini! Sama ra gyud mismo niadtong duha ka libo ka tuig na ang milabay. Ang kalibutan, niadtong duha ka libo ka tuig na ang milabay, nagpaabot mismo og usa ka Mesias nga mao'y magpapabilin niini. Mao nga duha ka libo ka tuig na ang milabay, gihatag sa Dios sa kalibutan ang usa ka Mesias. Tungod kay kung nagapaabot kita sa usa ka butang ug nagapangita og usa ka butang, ipadala man gyud kini sa Dios nganhi kanato. Ug karon ang kalibutan, human sa duha ka libo ka tuig, mibalik na sa mao gihapon nga kahimtang niini duha na ka libo ka tuig ang milabay. Nagakalumpag na, ang mga kanasuran, wala—wala na'y pundasyon sa kung asa man. Komunismo, Katolisismo, Protestantismo, pulitika, moralidad, ang tanan-tanan nangapukan na.

¹³⁰ Ug nanag-ampo sila para sa usa ka Mesias. Apan ania ang gusto kong isulti! Kung moabot Siya, dawaton kaha nato Siya o buhaton nato ang sama sa gibuhat nila kaniadto? Isalikway ba nato Siya? Nasayod ba kita kung unsa gayud ang gikinahanglan nato? Usahay ginatinguha nato, ginaampo nato ang atong mga tinguha, ug usahay pud ang atong mga tinguha dili mao ang atong panginahanglan. Kinahanglan natong maamgo nga wala gyud nato masabti kung unsa mismo ang atong gikinahanglan;

abi lang nato nga nasabtan nato. Pero nagsaad ang Dios nga igahatag Niya ang atong mga panginahanglan, ug buhaton gayud Niya kana.

¹³¹ Karon, unsa kaha kung ang akong anak nga si Joseph, nga siete anyos ang panuigon, gustong mouban kanako aron mangayam, ug mohilak ug mosiyagit aron madala ang akong awtomatiko nga shotgun, og kargahan kini og mga bala, “Mahimo nako nga makapatay og rabbit, Papa”? Bueno, ako—dili ko siya mahimong tugotan nga buhaton kana, bisan pa nga siya—naghunahuna siya nga gikinahanglan niya kini, apan mas nahibalo man ako bahin niini kaysa iyaha. Ug unsa kaha kung ang inyong gamay’ng bata nga usa ka tuig ug tunga ang panuigon makita kamo nga nagaahit gamit ang mahait nga labaha, ug mosiyagit ug mohilak aron makuha ang maong labaha? Tungod lagi nga nakita ka niya nga nagaahit, mao nga gusto pud niyang buhaton ang mao usab nga butang. Aba, kabalo gyud mo kung unsa ang pinakamaayo para kaniya. Mao nga inyong—dili n’yo siya tugotan nga makuha kana, tungod kay, kung usa kamo ka amahan nga makatarunganong maghunahuna nan dili gyud ninyo pasagdan ang ingon-anang butang, kondili ipahilayo n’yo hinoon kana kaniya. Ug usab daghang mga higayon nga nagatinguha kita og usa ka butang nga sukwahi diay sa nasayran sa Dios kung unsa gyud ang atong gikinahanglan, mao nga dili Niya kana ihatag kanato.

¹³² Ug nagaampo sila kaniadto alang sa usa ka Mesias. Nagtinguha sila og usa ka Mesias. Pero ania ang problema, gitinguha nila Siya sa paagi nga—nga gusto nila. Ug gipadala Siya sa Dios sa paagi nga gusto sa Dios Kaniya, ug ilang gisalikway Siya.

¹³³ Ug ginabuhat nila kini pag-usab sa karong panahon, mao ra usab ang ginabuhat, ila Kining ginasalikway pag-usab. Mao ra sa gihapon ang ginabuhat nila sa karon sama sa gibuhat nila kaniadto. Ngano man? Tungod sa mao rang hinungdan, sa mao ra mismong hinungdan. Miabot Siya kaniadto, ug nasayod kita nga miabot Siya. Miabot Siya, ug para kanila, wala Siya miabot sumala sa porma ug sa pamaagi nga gusto nilang moabot Siya. Ug kung magpadala kanato ang Dios og usa ka butang karon, nga nagatuaw kita para niini, ug ang iglesia, ug sa dihang ipadala na kini sa Dios dili man hinoon nato kini gusto. Tungod lagi nga wala kini nagaabot nga uyon sa atong pangdenominasyon nga panilaw. Wala kini nagaabot nga uyon sa atong—sa atong pang-teolohiyang panghunahuna mahitungod niini usahay. Apan mao baya kini ang—ang mismong butang nga atong ginaampo. Ang mismong hangyo nga atong gipangamuyo sa atubangan sa Dios, gipadala Kini sa Dios nganhi kanato, pero ginasalikway man hinoon nato Kini.

¹³⁴ Gusto nato og pang-Pasko nga regalo gikan sa Dios, pero lagi gusto nato kana sumala sa paagi nga gusto nato. Ginapadala

puod kana sa Dios sumala mismo sa gikinahanglan nato. Nasayod man Siya kung unsay angay sa nasud, nasayod Siya kung unsay gikinahanglan sa iglesia. Apan gahunahuna kita nga nahibalo kita, pero Siya man gyud ang nakahibalo kung unsa kini.

¹³⁵ Bueno, sa gikaingon ko na kaganina, ania na usab kita niining Pasko, diin ang kalibutan nagakalumpag na. Hisgotan nato ang pipila ka butang nga akong gisulat dinhi.

¹³⁶ Tan-awa n'yo ang imoralidad sa kalibutan, wala pa gayud kini sukad nahimong ingon ka ubos ang kahimtang, halos. Ako—aduna ko'y artikulo dinhi nga gusto ko lang basahon ang pipila ka linya niini. Makita kini sa usa—usa ka mantalaan, sa Standard Bearer, sa Africa, nga nagaingon, “Ang pagkamatay sa pagkaligdong. Ang kaligdong sa kababayan-an, ang maanindot nga kinaiyahan nga gipahimutang sa Dios sa pamilya sa tawo aron matipigan ang moral nga sukaranan niini, nagakamatay na karon, tungod nga ang inosente nga mga kababayan-an ug mga kabatan-onang babaye nanagyukbo na ngadto sa diosa sa mga urog ug wala na gyu'y pagpanuko nga mouyon-uyon sa pinakagrabeng pagpakaulaw sa modernong mga estilo sa kaligdong.” Aduna ko'y halos usa ka panid niini dinhi. “Wala pa gayud ako nakadungog sukad-sukad ug ingon nianang butang! Ug ang sex appeal giisip na nga lehitimo sa taliwala sa mga Cristohanon ug mga dili-Cristohanon.”

¹³⁷ Samtang anaa kami ni Igsoong Arganbright sa biyahe kaganinang sayo sa buntag, nahisgotan namo ang bahin sa niining hilisgotanan, nga panagsa na lang makakita og usa ka babaye nga adunay igong kaligdong nga mamula tungod sa kaulaw. Nadungog na nila ang daghan kaayo nga mga malaway nga pagpakatawa ug kahugawan, ug, aba, wala na kamo'y masulti og bisan unsa nga mamula gyud sila tungod sa kaulaw. Samtang, pipila na ka tuig ang milabay, kaniadtong bata pa ako, usa lang ka gamay'ng butang nga sayup, mamula na dayon ang ilang nawong, pag adunay kabatan-onan nga moagi, ug ang pang-ilalum nga sayal sa batan-ong babaye mosihag sa eskwelahan, ug samtang nagatindog ako niadto, nga nakig-istorya, ug pagtan-aw sa babaye ug nakita nga misihag diay ang pang-ilalum niya nga sayal, namula gyud ang iyang nawong, ug milakaw siya palayo sa ako, usa ka batan-ong babaye nga disesais anyos ang panuigon. Aba, unsay . . . kinaiyahan kana nga gihatag-sa-Dios aron tipigan ang atong moralidad.

¹³⁸ Dayon matingala pa kamo kung nganong ginabadlong ko ang ingon nianang mga kabuang nga makita nato karon, unya nagapatawag kita mismo nga mga Cristohanon, ug ingon niana ang sinul-oban sa mga kababayan-an ug ingon niana ang gawi, ug ang mga kalalakian-an nagapanigarilyo, ug tanan nang uban pa, ug nanagpatuyang na nga sama niana. Ug ang mga ministro sa pulpito, nagapakig-kompromiso lang, ug dili gani ka tugotan nga moduol sa pulpito aron magwali batok sa ingon nianang

mga butang. Nahunahuna ko kung dili ba kaha pareho gayud ang ginabuhat nato sa karong panahon sama sa gibuhat nila kaniadto duha na ka libo ka tuig ang milabay! Hinumdumi, nga kaniadtong misugod ang Israel nga buhaton ang ingon niana, nagpatungha ang Dios og usa ka Isaias. Sa dihang milabay na kadto nga panahon ug nagsugod na pud sila, nagpatungha na pud Siya og usa ka Jeremias, og mao gihapon sa mga nagsunod pa nga panahon. Ug wala baya ginausab sa Dios ang Iyang pamaagi sa pagbuhat og mga butang, Siya mao ang Eternal nga Dios. Dili Siya mahimong mausab. Ang una niyang ideya sa pagbuhat niini siguradong magapabilin gayud nga mao ra sa gihapon.

¹³⁹ Ang gikinahanglan nato karon mao ang usa ka Mensahe nga dinihogan sa pagka-Mesias ni Cristo. Pero dawaton kaha nila Kini? Nagaampo sila alang Niini, pero dawaton kaha nila Kini? Dili, sir, dili nila dawaton Kini. Ilang hinoon nila Kini sa krus sama sa ilang gibuhat kaniadto sa una. Malimbongon ang kasingkasing sa tawo.

¹⁴⁰ Ang moralidad, ang nasudnong panagbangi: Asa pa ba andam nga malumpag ang kalibutan sa moralidad kaysa niining panahona? Ug kinsa man ang—kinsa man ang nagpasiugda? Kita nga mga Amerikano. Niadtong atua ako sa—sa Sant'Angelo sa Roma, didto dili pa lang dugay, tupad sa lubnganan sa Sant'Angelo, aduna didto'y karatula para sa mga kababayan—ang Amerikano, ang ingon “Palihog magsul-ob kamo og sinina, ingon nga pagtahud sa mga patay, adisir mosulod sa lubnganan.” Usa ka relihiyosong nasud, gipakaingon pa nga usa ka nasud nga may kahadlok-sa-Dios! Nagakinabuhi kita sa mga nangaging kasinatian sa ubang mga tawo, sa atong mga unang-amahan kaniadto nga mga Cristohanon.

¹⁴¹ May nasudnong panagbangi. Wala pa gyu'y panahon sukad sa kalibutan nga kining kalibutana napaingon sa usa—usa—usa ka pagkabahinbahin ug pagkabungkag sa mga nasud kaysa nagakahitabo sa panahon karon. Aba, nakita man ninyo ang mga editoryal ug mga balita ug—ug mga komentarista ug mga magtatagna, ug uban pa, nga nagasulti mahitungod sa mga bomba ug kung unsa ang mahimo sa mga niini, nga bisan unsang gamay'ng nasud, arang gun-ubon ang tibuok kalibutan. Ug wala na'y pakigdait sa taliwala nila. Dili kamo makahatid og kalinaw sa ingon nianang paagi. Ang pakigdait ug pagpakig-fellowship dili mahimong moabot pinaagi—pinaagi sa pulitika, nagaabot kini pinaagi ni Cristo. Dili nila gustong dawaton Kini.

¹⁴² Daghan pa gyud ko og masulti nga mga butang dinhi! Ang pagkadunot sa ato mismong pulitika, grabe, ingon na gayud ka dunot ang pulitika! Nadungog ninyo ang *Monitor* niadtong miaging gabii, siguro, o sa hunahuna ko sa niining pagsibya, usa o duha ka oras gikan dinhi sa Louisville, kon diin nakakonekta sila sa tibuok nasud, ug nagakomento sila, nagakomento sila usahay mahitungod sa nagkalainlaing mga hilisgotanan, ug

gipasibya nila ang mahitungod sa pagbiya ni Mr. Nixon sa pulitika sa dihang napildi siya kaniadtong midagan siya, sa lumba sa pulitika sa Los Angeles, o sa tibuok California, ug “Mobalik pa kaha siya?” Ug sa pagpasibya niadto, human sa duha o tulo ka oras, naminaw ko niadto samtang nagbiyahe ko paingon sa balay ni Igsoong Charlie dinhi, ug naminaw, kami ni Igsoong Wood, sa radyo. Ug hingsayran namo nga si Nixon, sa tanang probinsya dinhi sa sidlakan, kutob sa maabot sa maong pagsibya, gikan sa Mississippi hangtud sa Pennsylvania, nga iyang gipildi si Mr. Kennedy, ug nagapanawag ang mga tawo ug nagapahayag, nga halos upat kono batok sa usa ra ka boto. Dayon adunay lalaki nga mitindog ug miingon, “Kung wala lang kamo migamit—migamit og mga makina nga may pagpanikas nan siya na unta ang Presidente.” Ingon niana. Ang pulitika, may pagpanglimbong, dunot na gyud sa parehong duha ka partido. Dili ko siya mabasol, mosurender pud, ko, ug pasagdan na lang ang maong malaw-ay nga pagpanikas, mahanaw man pud kini kauban sa kalibutan. Pero ipataas n’yo ang inyong mga kamot ngadto kang Cristo ug moingon, “Ania ako nagaduol, Ginoo.”

¹⁴³ Nasudnong panagbangi. Ug karon ang angay ninyong hunahunaon nga unta naningkamot sila nga magkahiusa, pero nagkabalug-bulag man hinoon sila og ayo. Ingon niana usab ang nahitabo niadtong panahon sa pag-abot duha na ka libo ka tuig ang milabay sa dihang nagakalumpag ang kalibutan. Nagakalumpag na kini karon ilalum sa mao ra gihapon nga mga kahimtang.

¹⁴⁴ Ug dayon anaa pud ang kahugawan sa iglesia! Oh, grabe! Kahugawan sa relihiyon! Oh, walay-katarungan nga makita ang kalibutan human ang duha ka libo ka tuig sa Biblia ug ingon nga ang Balaang Espiritu ania sa yuta, ug karon nagakalumpag na kini nga ingon ka grabe sama niadtong duha ka libo ka tuig ang milabay. Kahugawan sa relihiyon. Misulod ang pulitika sa relihiyon, ug misulod ang relihiyon sa pulitika. Makalilisang gayud nga makita ang ingon nianang kahimtang! Kabalo ko nga makalilisang gayud. Moingon mo, “Igsoong Branham, dili unta ka maghulagway kanamo og ingon nianang hulagway sa panahon sa Pasko.” Kinahanglan ninyong masayran ang kamatuoran, kana ang angay ninyong masayran! Karon, unsaon man. . .

¹⁴⁵ Magapanalangin man ang Dios, pero kana nga panalangin kinahanglan moabot ilalum sa usa ka partikular nga kahimtang, partikular nga mga kinahanglanon nga angay ninyong matuman. Ug kung dili ninyo matuman kana nga mga gikinahanglan, nan ang mga panalangin ug mga saad sa Dios wala’y epekto kaninyo. Nagsaad ang Dios nga tagboon ang Israel samtang ginatuman nila kadtong sinsero nga mga kapistahan ug mga ingon-anang butang, nga may—may pagkabalaan ug pagkamatinuuron. Gitagbo sila sa Dios. Pero sa dihang siya,

gibuhat na lang nila kini nga mora'g rituwal sa pamilya, mao nga nagdumili na ang Dios sa pagbuhat niini. Ang ingon Niya nga baho na sila sa Iyang atubangan. Ug mao ra gihapon sa karon, mao nga kita—kita—kita angay gayud nga mobalik sa kung unsa ang kamatuoran bahin niining butanga.

¹⁴⁶ Pulitikanhong panagbangi sulod sa mga iglesia! Anaa na kita karon sa mga siyam ka gatus ka nagkalainlaing mga denominasyon sa Cristianismo, nga ang matag usa nagapakig-away sa usa pa. Bueno, kana'y, dili pa man gyud ingon niana ka dautan kaniadtong mianhi Siya, ngani mga upat o lima lang man sila ka sekta kaniadto, mga Fariseo ug mga Saduceo, ug uban pa. Apan karon aduna na man kita og sobra sa siyam ka gatus. Aba, anaa kini sa mas grabe nga kahimtang, ang iglesia, sa niining Pasko, kaysa kaniadtong Pasko nga dise-nuebe na ka gatus ka tuig ang milabay. Anaa na kini sa mas grabe nga kahimtang karon. Pang-denominasyon nga panagbangi! Ang hinungdan niining tanan, higala, tungod kay pulitika na man ang mipuli sa lugar sa Balaang Espiritu. Gusto sa Balaang Espiritu nga gamiton ang Pulong sa Dios ug pangunahan ang iglesia paingon sa kadaugan, pero ang mga programang pang-edukasyon ug mga programa sa pulitika, mga kredo ug mga denominasyon gidala hinoon kini sa siyam ka gatus ka nagkalainlaing mga direksiyon. Busa ang iglesia wala na'y. . . Ang ginatawag nga "iglesia." Dili ang tinuod nga Iglesia ang buot kong ipasabot; tungod nga padayon gihapon Siya nga nagadilaab, oh, oo, nagapabilin Siya nga mao ra sa gihapon. Pero ang ginatawag nga "iglesia" sa kalibutan, nga mora og—og katukoranan nga ginabutang sa. . . mao ang nagahiusa sa kalibutan, nga naggansilyo sa ginatawag nato karon nga mga moralidad ug mga butang nga iya sa kalibutan, mahugaw na kini. Ang—ang mga lanot niini dunot na, ug siya'y. . . mga anay sa pagkamahakogon, nga ginakaon niini ang mismong pundasyon gikan sa ilalum. Tinuod gayud. Anaa na kini karon sa kahimtang nga gikaingon sa Biblia nga madangatan niini, Ikaduhang Timoteo 3, "Gahi'g ulo, hambugiro, mga mahigugmaon sa mga kalingawan labi pa kaysa sa paghigugma sa Dios," ug uban pa.

¹⁴⁷ Dayon kung makita nato ang pulitika nga anaa na sa kahimtang nga nahimutangan niini diha sa mga nasud, ug makita nato ang mga iglesia nga anaa na sa pagkadunot niini diha sa mga denominasyon, ug bisan pa niana gusto gihapon nato nga moabot ang Dios sa ingon nianang mga butang. Dili gyud monaug ang Dios diha nianang kanal uban kanato, ilalum sa mga butang nga gusto nato nga Iyang pagaabtan. Dili Niya kana buhaton. Balaan Siya ug Siya—Siya—nasayod Siya kung unsa ang pinakamaayo. Kung magatawag kita, Siya magatubag kanato. Ug pag magpadala Siya og tubag, ginasalikway nato Kini. Ang gusto man gud nato Niini mao'y sumala sa paagi nga gusto nato Niini. Ug nagapaningkamot kita nga moduol

sa Dios, ug nagapaningkamot nga luwason ang atong mga kaugalingon, pinaagi sa mismong butang nga napamatud-an na kanato. Iglesia, kung mahimo patalinghugi ninyo kini! Ang mismong butang nga gipamatud-an kanato sa Dios, nga nagpadaut kanato, ug bisan pa niana nagalantaw gihapon kita sa mismong sistema aron luwason kita. Pamalik na kamo sa Pulong! Mao kana igasulti sa Mesias. Karon, pero nagalantaw hinoon kita sa—sa pulitika. Ginasulayan nato para sa mga nasud sa kalibutan, ginasulayan nato nga masalbar kini pinaagi sa pulitika. Ang gusto sa iglesia nga masalbar ang atong kalibutan (kalibutan sa iglesia) pinaagi sa pulitika. Balik-balik na lang kining yugto sa kalibutan, sukad pa niadtong panahon ni Moises. Mao ra gihapon, ang pulitika nga gapaninguha mangulo. Ug dunot kini. Wala gyu'y paagi nga mahimo kini sa usa ka tawo, wala gyu'y maayo diha sa usa ka tawo sa sugod pa lang. Mao kana'y hinungdan nga kinahanglan niyang mamatay.

¹⁴⁸ Ug sa dihang atong—sa dihang atong—sa dihang atong makita kining kalibutan nga anaa sa ingon-ani nga kahimtang, nga daw sa nagakalumpag sa matag kapanahonan, pag nagadangat ang kalibutan sa ingon niana nga kahimtang, nagaampo ang mga tawo. Oh, bisan ang Presidente nagapanawag (unsa man kadto?) og diyes minutos ra o usa ra ka oras o mga ingon niana, nga pag-ampo. Pero wala kana'y mahatag nga kaayohan. Ang gikinahanglan nato dili usa ka pag-ampo, kondili usa ka paghinulsol, pagpasig-uli, pagpahilayo, pagtalikod. Pamalik kamo sa Dios! Mas pilion ko pa ang kahupayan ko nga matukod sa Pulong sa Dios ug sa bautismo sa Balaang Espiritu, sa Presensiya ni Cristo, kaysa sa tanan nga seguridad nga mahatag kaninyo sa pulitika o sa mga simbahan. Tinuod gyud, tungod kay nasayod ko nga magpabilin gyud Kana.

¹⁴⁹ Wala kita'y nasud diin mas hamugaway ang kahimtang nato, kung ang anaa lang unta kanato ang nasud sa Dios, ang Ginghamian sa Dios. Ang Dios sa kanunay nagatubag ug nagapadala kanila og kahupayan, apan dili nila gustong dawaton kini. Nga, nagatubag man ang Dios pag mahidangat ang nasud sa ingon niini nga matang sa mga kahimtang, matag higayon. Sa diha nga ang kalibutan, diay, nahidangat sa ingon niini nga kahimtang, nga nagakalumpag na, nan ginatubag sa Dios ang ilang pag-ampo, ginapadalhan sila og usa ka propeta o ingon niana, usa ka gamhanang propeta aron sawayon kini. Apan ayaw nilang maminaw kaniya. Unsa ma'y ginabuhat nila? Ginabutang ang propeta sa lubnganan. Miingon si Jesus, “Kinsa ba kaninyo, nga wala gibutang sa inyong mga ginikanan ang mga propeta didto sa lubnganan, ug unya papution, papution sila dayon, ug tukoron ang ilang mga lubnganan? Ug kamo man ang nagbutang kanila dinha.” Husto kana. “Kinsa sa . . .?” Nangayo sila og tabang, gipadala kini sa Dios ngadto kanila,

ug gisalikway nila kini. Kung ingon-ana man, ang Dios ba ang angay basolon o ang mga tawo ang angay basolon? Ang mga tawo ang angay'ng basolon. Tinuod gyud.

¹⁵⁰ Kaniadtong natawo si Jesus, ang kalibutan, sa gikaingon ko na, nagakalumpag na. Gikontrolar kini sa pulitika, ug dunot na ang pulitika niadtong mga panahona. Dunot na ang nasudnong iglesia. Nagapaabot kaniadto ang mga Romano ug mga Griyego og usa ka dinihogan nga mesias. Ang mga Griyego ug mga Romano nga tingali adunay pinakamaayong bahin sa kalibutan, ug nagpakig-away sila, sa usa'g usa, busa sila—nanagpaabot sila kaniadto og usa ka dinihogan nga mesias nga moabot. Ug ang mga Judio, nagtinguha pud sila og usa ka mesias nga moabot. Ug samtang nagapaabot ang mga Romano og usa ka batid nga pulitiko nga mobarug sa Roma, sakupon ang Gresya ug sultihan sila kung unsaon pagbuhar niini, ug ang Roma na ang maghari sa kalibutan. Gusto pud sa Gresya og usa ka batid nga pulitiko nga mobarug, dinihogan nga pulitiko, usa ka mesias, nga moingon, “Atong—atong buntogon ang mga Romano ug mga Judio, ug ang tanang uban pa kanila.” Kita n'yo, mao kana'y ilang ginapangita.

Kung dili ba ingon-ana mismo ang hulagway sa karon, nan wala na ko kabalo kung unsa. Husto!

¹⁵¹ Gusto sa pulitika og usa ka dinihogan nga mesias. Ug nagapaabot ang mga Judio sa usa ka mesias, pero ang gusto nila nga moabot mao ang usa nga dili sama sa anaa na kanila, gusto man gud nila og usa ka heneral nga moabot ug parehong paphaon gikan sa yuta ang Roma ug Gresya alang kanila. Ingon-ana nga matang sa mesias ang gusto nila. Nanag-ampo sila kaniadto para sa ingon-ana nga matang sa mesias. Miingon ang mga Romano, “Padalhan unta kita og usa. Botaran nato ang si kinsa man nga tawong dinihogan, usa ka tawo nga may panabot, usa ka maalamon sa pulitika, nga kahibalo siya mismo sa estratehiya aron sakupon ang Gresya ug ang tanang uban pa sa kalibutan.” Ang tanang uban pa sa kalibutan nagatuaw og, “Padalhan unta kami og usa ka tawo nga—nga mamahimong—nga mamahimong dinihogan gayud nga utokan ang panghunahuna nga nahibalo mismo kung unsaon pagsakup sa tanang uban pa sa kalibutan.”

Karon, kung dili ba ingon-ana mismo ang hulagway niining kalibutana karon, nan wala na ko kabalo.

¹⁵² Ug ang iglesia, nagahangyo pud, “Padad-an unta kami og usa ka heneral nga moanhi, ug sul-oban ang matag usa kanamo og hinagiban, ug nakahibalo kung unsaon paggamit og espada ug sultihan kami sa estratehiya, ug paphaon namo ang Roma, ang Griyego, ug ang uban pa kanila gikan sa yuta.” Sa ingon nianang paagi nila gustong buhaton kini, ang maghari! Mao kana ang—ang gahum.

¹⁵³ Mao ra gihapon sa karon ang atong makita sa mga kaiglesiahan. Kamong mga Methodist, nagapaabot kamo sa usa ka mesias. Unsa man nga matang sa mesias? Dili ang usa nga ipadala sa Dios kaninyo. Kamong mga Baptist, nagapaabot man kamo sa usa ka mesias. Kamong mga Assemblies of God, nagapaabot pud kamo sa usa. Kamong mga Oneness, nagapaabot pud kamo sa usa. Husto kana. Apan unsa ba ang inyong ginapangita? Mao ra gihapon sa ginapangita sa kalibutan sa pulitika. Usa ka bantugang batid sa matematika, usa ka batid nga eskolar nga may D.D., Ph.D., nga moadto sa inyong iglesia, nga magpahugno niining uban pang mga denominasyon ug himoon ang tanan nga magpamiyembro sa inyoha. Usa ka tawo nga maayo kaayo sa pagpangkabig nga mahimo niyang kumbinsihon ang tanan.

¹⁵⁴ Nagatuaw kamo alang sa usa ka mesias karong panahon sa Pasko. Uh-huh. Unsa ma'y nadawat nila? Ilang—gusto nila kini. Gusto nilang dumalahan kini. Gusto sa kalibutan karon nga magdumala. Gusto sa iglesia nga magdumala, ang matag denominasyon. Pero tan-awa n'yo kung unsa ang gihatag sa Dios kanila! Gusto nila kaniadto og usa ka maalamon nga sundalo. Gusto nila og usa—usa ka maalamon sa siyensiya, apan gihatagan sila sa Dios og usa ka Cordero, usa ka Bata. Pagkadakung kalainan! Sa hunahuna n'yo dawaton kaha nila kadtong Bata nga nagahilak? Apan mao baya kadto ang gikinahanglan nila. Ang ginahatag sa Dios kaninyo mao'y sumala sa inyong mga panginahanglan. Mao gayud. Sila... aduna Siya'y... Usa ka Bata ang nadawat nila sa dihang nangandoy sila og usa ka heneral; apan ang ilang nadawat usa hinoon ka Bata, nga maaghop, mapaubsanon. Nasayod mismo ang Dios sa ilang mga panginahanglanon, bisan pa man.

¹⁵⁵ Wala gayud Siya mianhi aron mahimong usa ka pulitiko sa nasud o sa iglesia. Ug kung moabot man ang Mesias karon, dili Siya mamahimong usa ka pulitiko sa nasud o sa iglesia. Ug kung magapangayo kita og ingon niana nga tawo, padalhan kita sa Dios og kagawasan, apan kinahanglan nato Kining dawaton sumala sa paagi nga ipadala Niya Kini. Pero wala nila gidawat, dili nila gusto Kini sa ingon niadto nga paagi. Nagatuaw ang iglesia karong panahona, “Oh Langitnong Amahan, mahimo ba nga Imong ipadala si Jesus nganhi kanamo? Mahimo Mo ba?” Ug sa dihang magsugod na nga mamuhat ang Balaang Espiritu, “Oh, kana'y... Dili ingon-ana ang among gusto.” Kita n'yo? Bueno, moingon mo, “Oh, oh, dili kami mosugot nga kining tawhana mao'y mangulo kanamo. Oh, dili ko gusto nga maminaw Niana. Dili. Akong... dili ko madawat Kana, dili man motoo Niana ang akong denominasyon.” Kung ingon-ana dili diay ninyo gusto og usa ka Mesias, dili n'yo gusto og pagdihog. Kung magpadala ang Dios og usa ka Mesias, nan mamahimo Siyang eksakto gayud nga Pulong sa Pulong sa Biblia, eksakto

mismo sa kung unsa Siya kaniadto sa unang higayon. Ang pagtuaw sa kalibutan, pagmakita nato ang mga pulitiko ug tanan nang uban pa nga ginapiut ang mismong Kinabuhi sa iglesia, ug mao nga nagatuaw kita, ug gipadala Kini sa Dios nganhi kanato, dayon isalikway nato Kini. Husto kana, dili nato kini dawaton. Dili, kung wala Kini mitukma sa atong—atong pang-denominasyon nga mga tinoohan, dili nato Kini madawat. Kita n'yo? Oh, dili ba ninyo makita kung unsa gayud ang tinuod nga Pasko. . . Dili Kini gusto sa mga tawo. Dili nila gusto ang paagi sa Dios sa pagpadala Niini. Nagapaabot sila sa usa ka butang, apan dili nila Kini gusto.

¹⁵⁶ Bueno, gipadad-an sila sa Dios, niadtong panahon nga nanagtuaw sila, dili og usa ka maalamon nga sundalo, dili usa ka maisog nga heneral nga nagaadto nga may sul-ob og bilya ug hinagiban, ug may supernatural nga espada o bangkaw nga mahimo niyang pildihon ug ipakalagiw ang Roma ug Griyego ug ang tanang uban pa kanila ngadto sa dagat ug lumsan sila pag-usab. Wala Siya nagpadala og butang nga sama niana, bisan pa nga miingon Siya nga gibuhat na Niya kana usa ka higayon kang Moises, apan ingon niana man gud ang gikinahanglan nila kaniadto. Apan ang gipadala Niya kanila usa ka Manluluwas ug ayaw nila Niini. Abi nila og adunay. . . hilwas sila. Kita n'yo? Ingon niana usab sa mga kaiglesiahan sa karong panahon. Ang makita n'yo karong panahon sa Pasko mao ang tanang nagagilak-gilak nga dekorasyon sa Pasko, mga suga nga Santa Claus, mga paganong kinaiyahan ug mga ingon-anang butang nga gipasulod ngadto sa mga iglesiang Katoliko ug Protestante, ug ingon gayud ka dunot. Ug nagpadala ang Dios kanila og usa ka Manluluwas. Para unsa? Aron mobalik sa Pulong. Ang Balaang Espiritu, ang Mesias sa Dios, ang Iyang Dinihogan, aron dihogan ang Iyang iglesia ug dad-on kini pabalik sa Pulong. Sa hunahuna n'yo gustohon ba nila Kini? Dili, sir. Ayaw nila Niini. Balibaran gihapon nila siya sama sa kanunay na nilang ginabuhat.

¹⁵⁷ Nagpadala Siya og usa ka Manluluwas, apan para sa unsa man nga nagpadala Siya og usa ka Manluluwas? Gusto kong ipahayag ang usa ka gamay'ng butang dinhi nga makatabang kaninyo. Aduna gyu'y predestinado nga mga tawo nga modawat niini. Ngani aduna ma'y midawat kaniadtong mianhi Siya sa unang higayon, aduna sa gihapon og mga modawat pagmoabot na Siya sa ikaduhang higayon. Bisin unsa pa ang hunahunaon sa kalibutan sa iglesia mahitungod niini, ang uban. . . Wala Niya Kini ginapadala sa walay kapuslanan. Aduna gyu'y modawat Niini. Aduna gyu'y modawat Niini, kana lang; apan dili ang kalibutan sa pulitika o ang pulitikanhong iglesia, o unsa man. Apan sa dihang motuaw ka ug ipadala Kini sa Dios, aduna gyu'y tawo nga—nga modawat Niini. Husto.

¹⁵⁸ Nagpadala Siya og usa ka Manluluwas, dili aron

pagatumban ang mga nasud. Sama sa atong ginahunahuna sa karong panahon, nga nagkinahanglan kita og usa ka tawo nga makabarug. Ang gusto sa Amerika mao ang usa ka tawo nga mao'y mopukan sa Rusya si bisan kinsa man nga ayaw niini. Gusto pud sa Rusya og usa ka tawo nga mao'y mopukan sa tanang uban pa sa kalibutan ug dad-on sila ngadto sa bulan. Apan ang Dios nagapadala kanato og pakigdait. Ang Dios nagapadala kanato og paglaum. Dili nato gusto kana. Oh, moingon pa, "Kita—mahimo man nga magkaaduna kita og kalinaw, gusto sa mga nasud ang kalinaw." Tinuod. Ug abi nila nga maangkon nila kana kon mahiusa ang UN. Bueno, ang UN halayo ra kaayo niini. Ang pakigdait niining kalibutana, nga anaa niini karon, sama ra sa usa ka gomang balloon nga nagalutaw-lutaw diha sa hangin, nga kung adunay diyutay lang nga hangin mahimo na kining dalhon sa kung asa man niini gusto. Mao gyud. Sa unsa mang diyutay'ng pag-usab sa pulitika mapalid dayon kini gikan sa usa ka bahin paingon sa usa pa. Dili gani ka puedeng mag-ampo diha sa UN tungod kay basin kono og makapadaut kini sa dungog sa ubang tawo, sa mga pagbati sa mga tawong wala gani nagatoo sa Dios. Pagpalig-on unta kana, dili ba? Nagalutaw-lutaw lang sa bisan asa nga direksyon. Ug usa pa, mobuto ang usa ka balloon tungod sa bisan unsa mang butang, usab. Amen. Ug ang pakigdait *kono* niining kalibutana, pinaagi sa UN, ug uban pa, mobuto usab. Husto. Tungod wala ma'y pakigdait diha niana. Dili ka makakaplag og pakigdait pinaagi sa kalampusan nga hinimo sa tawo. Wala kini dinha. Nga ginapalid-palid sa matag hangin!

¹⁵⁹ Gusto sa iglesia og usa. Gusto nila . . . ang ilang pakigdait halos . . . ginapalid-palid sa matag doktrina, usab. Ginapalid-palid ra ang tanan, moingon ang usa kanila, "Oh, sa hunahuna ko ang kinahanglan lang natong buhaton . . ."

¹⁶⁰ Nahunahuna ba ninyo? Dili na ninyo kinahanglan nga maghunahuna. Gipahayag na sa Dios ang Iyang mga hunahuna. Wala ka'y katungod nga maghunahuna pa. "Batoni ninyo ang hunahuna nga diha kang Cristo." Ug Iyang gituyo ug gibuhat ang kabubut-on sa Dios. Miingon Siya, "Kung wala Ko ginabuhat ang mga buhat sa Dios, kung ingon-ana ayaw ninyo Ako toohi." Kita n'yo? Dili na ninyo kinahanglan nga maghunahuna. Siya na Mismo ang nagahunahuna. Tugoti nga maanaa kaninyo ang Iyang hunahuna, aron pareho mismo ang inyong ginahunahuna, ug mao kana ang Iyang Pulong. Unsaon man ninyo paghunahuna pa og lahi? Gipahayag na Niya ang Iyang mga hunahuna nganhi kanato. Apan gusto gihapon natong maghunahuna, "Sa hunahuna ko angay nilang buhaton kini."

¹⁶¹ Mibiyahe ako kagahapon kauban ang usa ka minahal nga kalag, mibiyahe aron iampo ang usa ka bata nga may sakit. Ug pag-abot namo ngadto sa nagmasakiton nga bata, dili gusto sa pamilya nga iampo namo ang bata, ideya kadto sa maong

lalaki didto. Bisan pa man, sa pagpaingon didto, miingon kining babaye, usa ka tigulang nga babaye nga mga otsenta'y-uno anyos na, maalam, utokan nga babaye, buotan kaayo, pero ingon siya, "Sa hunahuna ko ang angay'ng mahitabo," (kita n'yo, "sa hunahuna ko") "nga ang tanang mga iglesia angay unta nga maghiusa ug mamahimong usa ra." Ingon niana mismo ang panghunahuna sa yawa. Apan ang gusto sa Dios nga mohimulag gyud Iyang Iglesia gikan sa mga butang nga iya sa kalibutan. Ayaw Niya nga mahilambigit kini sa pulitika sa iglesia. Kita n'yo? Ug unsa kaha kung magpadala ang Dios og usa ka Mesias sa kalibutan? Ug kana'y... Gihunahuna lang niadtong maong babaye ang hunahuna mismo nga iya sa tibuok kalibutan. Unsa man ang Konpederasyon sa Iglesia kondili ang mao ra nga hunahuna? Unsa ba ang World Council of Churches kondili para sa mao ra nga katuyoan aron matuman ang mismong ideya? Husto ba? Bueno, kung ingon-ana, ang babaye, gipahayag lang niadtong maong babaye ang mga hunahuna mismo sa kalibutan.

¹⁶² Apan ania ang mga hunahuna sa Dios diha sa Biblia. Wala kita'y katungod nga modawat og lahi Niana. Mao kana ang mga hunahuna sa Dios nga gipahayag nganhi kanato. Makita nato, og makaplagaan ang kalibutan nga nagakalumpag na, ug nagatuaw kita alang sa usa ka butang. Dawaton nato Kini. Karon, kung dawaton ug paninguhaan nga agakon kita paingon sa pulitika, nan mao kana ang mismong butang nga magpadaut kanato.

¹⁶³ Aduna ko'y diyutay'ng butang nga akong isulti sa nasudnong lider sa niining Christian Business Men. Usa kini ka maayong grupo sa mga tawo, apan kung mosugod silang motipas sa sayup nga paagi, modangat gyud sila sa pagka-abog sama sa uban pa kanila, mahimong usa ka denominasyon. Ug gusto ko nga iampo n'yo ako ug iampo kini nga lalaki. Kinahanglan kong moadto, aduna ako'y usa ka panan-awon gikan sa Ginoo para kaniya. Kita n'yo? Ug kung dili sila moliko, kung mopadayon ra sila, nan mopaingon gyud sila sa pagka-organisasyon. Ug, pag ingon-ana ang mahitabo kanila, nan human na ang Dios niana. Husto kana.

¹⁶⁴ Kita n'yo, dili mahimong magkahiusa ang mga tawo gawas kon sulayan nilang masunod og kaugalingon nilang mga ideya. Mao kana'y hinungdan kon nganong mga indibiduwal ang ginagamit sa Dios. Kita n'yo? Wala ang Dios sukad nagapakighilambigit ug wala gayud nakighilambigit sa usa ka denominasyon. Walay bahin sa kasaysayan nga gibuhat Niya kana. Kondili nagapakighilambigit Siya sa tagsa-tagsa, sa usa ra ka tawo. Husto kana. Apan ginapaningkamotan natong hiusahon ang usa ka pundok sa mga tawo ug nagaingon "kini'y *ingon niini* nga paagi ug *ingon niana* nga paagi," ug uban pa. Mahibaloan mo na lang, may bantugan, utokan, og maalamon ang panghunahuna, kining mga higante nga gipadala sa yawa, nga mosulod ug moingon, "Bueno, kinahanglan ingon niini *kini*. Mapamatud-an ko kini kaninyo." Bisan unsa pa

ang mapamatud-an ninyo, kung supak kana sa Pulong, nan pahilayo kamo niana. Husto. Ginapalid-palid sa matag hangin sa doktrina. Paliron sa bisan asa ug mobuto ra sa unsa mang orasa. Tinuod kini.

¹⁶⁵ Ang Rusya karon nagapangita og usa ka dinihogan nga mesias. Unsa man ang ilang ginapangita? Unsa kaha kung padad-an sila sa Dios og dinihogan nga Mesias, usa ka Cordero nga sama sa Iyang gipadala niadtong dise-nuebe na ka gatus ka tuig ang milabay? Ila gihapon Kining ipapatay sama sa gibuhat ni Herodes, maningkamot kutob sa ilang mahimo aron Kini mapatay. Unsa ma'y opinyon sa Rusya mahitungod sa usa ka mesias? Gusto nila og siyensiya. Gusto nila og usa ka dinihogan nga siyensiya, siyentista, usa ka utokan nga arang sakupon ang kalibutan para kanila, aron maunahan nila sila, ang tanang uban pa sa kalibutan ngadto sa bulan, tawo nga arang sakupon ang outer space, tawo nga maoy modala kanila ngadto sa mga bitoon. Ingon-ana nga matang sa mesias ang ginapangita sa Rusya.

¹⁶⁶ Oh Dios! Karon paminaw mo, ania na usab kita sa panahon sa Pasko. Unsa kaha kung magkaaduna sila niini? Kung ingon-ana pangita kamo og usa ka butang nga pangkontra niana. Unsa na lang ang dangatan sa tanang uban pa nga mga tawo nga gibuhat sa Dios? Kita n'yo? Kita n'yo, nasayod ang Dios sa kung unsay atong gikinahanglan, dili ang gusto nato. Karon tun-i ninyo kana. Unsa kaha kung madawat sa Rusya ang ilang dinihogan? Karon, dili nila dawaton ang usa ka Cordero. Dili, dili, dili gyud nila dawaton ang bisan unsa. Dili, sir, ayaw nila niini. Ingon niana lang kini, ayaw gayud nila niini. Dili nila gusto og bisan unsa nga sama niana. Ang gusto nila usa ka dinihogan nga mesias. Bueno, ang *mesias* nagakahulogan og “usa ka dinihogan.” Bueno kung ingon-ana gusto nila og usa ka dinihogan, apan gusto nila og usa ka dinihogan nga siyentista, usa ka tawong utokan nga mahimo kuhaon ang mga atom ug bulag-bulagon ang mga niini, nga mahimong sakupon ang kawanangan, nga mahimong dalhon ang Rusya ngadto sa bulan ug molingi ug tapik-tapikon ang iyang kaugalingon diha sa dughan, ug moingon, “Ang tanang uban pa kaninyo sa kalibutan mga iro lang, alagari kami.” Mao kana, ingon niana ang gusto sa Rusya. Oh, oo, sir. Kabalo mo, nagatuaw ang tibuok kalibutan. . .

¹⁶⁷ Nagtuaw ang Germany para sa usa sa mga niini dili pa lang dugay. Aduna pud sila'y usa. Tan-awa n'yo kung unsay gidangatan nila tungod niadto, usab. Kita n'yo? Nasabtan man ninyo, dili ba? Aduna sila'y usa ka Hitler. Ug unsa ma'y gidangatan nila mismo? Kagubot. Mao kana ang ginapakahulogan niining dinihogan nga mesias kung isalikway ninyo ang Mesias sa Dios. Unsa ma'y ilang nadangatan? Sa dihang miabot ang mga pentecostal nga panalangin sa Rusya,

o sa Germany, gisalikway nila ang Mensahe. Gikataw-an nila sila ug gibalhog sila sa bilangoan. Unsa ma'y gibuhat nila? Ilang gisalikway ang Krus, ug gidawat nila ang dobleng krus, ang swastika. Kon dili ninyo dawaton ang kalooy, kung ingon-ana wala na'y nahibilin pa kondili ang paghukom. Tinuod kana, higala. Karon tan-awa ninyo kung asa na sila karon. Kita n'yo? Himatikdi, wala sila'y gipamiyembrohan bisan asa, mga tawo lang sila nga nagkabulagbulag. Sayup nga mesias ang ilang gidawat. Ug kung dawaton sa Rusya ang usa nga sama niana, bisan unsaon pa nila pagdawat ang ilang mga tawong utokan, modangat gyud kini sa mao ra nga butang. Pagagun-obon niana ang tibuok nasud. Kita n'yo?

¹⁶⁸ Ang India karon nagatinguha og usa ka dinihogan. Gusto nila og usa ka mesias. Karon hinumdumi, ang *mesias* nagakahulogan og “dinihogan.” Gusto nila og usa ka dinihogan. Unsa ma'y ilang gusto? Gusto nila og usa nga magpakaon kanila, hatagan sila og makaon; bistihan sila, nga dili na magtrabaho para niini, magalakaw-lakaw lang sa kadalanan ug magaitsa-itsa gikan sa usa ka bahin ngadto sa pikas bahin. Mao kana. Dili sila motrabaho, gusto lang nilang manglimos. Busa gusto nila og usa ka matang sa balaan nga tawo nga motungha nga makahimo sa pagtunob sa itaas sa mga kahoy ug uyogon kini, may tinapay na ug karne ug—ug mga ingon-anang butang, nga mahulog, sa ibabaw nila, ug molingkod lang sila ug mokaon ug matulog na sa tibuok adlaw, ug mobangon ug magsul-ob og pinakanindot nga mga sinina, ug ingon-ana—ingon-ana nga matang sa mesias ang gusto sa India.

¹⁶⁹ Ang gusto sa Rusya mao ang usa ka maalamon sa siyensiya alang sa ilang dinihogang mesias karong Pasko. Ingon niana ang gusto nilang ihatag kanila. Gusto sa India og usa ka mesias nga makahimo sa pagpakaon kanila ug bistihan sila, nga dili na sila magtrabaho.

¹⁷⁰ Amerika, unsa ma'y imong gusto? Unsa ma'y imong opinyon, Amerika? Dugay na ka nagatuaw alang sa usa ka mesias. Nasayod ko nga ginatayp kini. Nagatuaw kamo alang sa usa ka mesias. Unsa ma'y inyong gusto? Anaa na kaninyo ang inyong gusto. Gusto n'yo og usa ka pulitiko, ug nadawat n'yo na kini. Karon unsa ma'y inyong buhaton niini? Panitan kamo, eksaktong ingon niana ang buhaton niini, dad-on kamo ngadto sa inyong lubnganan. Gitinguha n'yo kini, og naangkon n'yo ang inyong tinguha. Karon unsa ma'y inyong buhaton niini? Anaa na kini sa inyong mga kamot karon, modernong Ahab ug Jezabel. Ang mismong butang mao nga mikalagiw kamo dinhi alang sa kagawasan, mibalik hinoon kamo mismo ngadto niini, apan mao kana ang inyong gitinguha. Gusto ninyo og usa ka Ricky nga pina-flattop ang alut, modernong Elvis niining panahona, naangkon n'yo mismo. Gusto ninyo og usa ka maantigo, edukado nga pulitiko nga utokan og panghunahuna, naangkon pud

ninyo. Giunsa man ninyo pagpakaangkon niana? Pinaagi sa pagpanikas, usa ka makina sa pulitika ang nagpasulod niini, nga nagtabon sa mga mata sa maayo nga mga tawo. Bueno, dili baya ako Democrat ni Republican man, usa ako ka Cristohanon. Kita n'yo? Kita n'yo? Ang duha pareho lang silang dunot. Apan sa diha nga may usa ka tawo nga nagpakita mismo og mga hunahuna ug paglaum sa Cristianismo sa pikas bahin, ug dayon mitalikod kamo ug nagbutang og mga makina (aron buhaton ang unsa?) aron pilion ang utokan nga gusto ninyo. Giunsa man ninyo pagbuhat niana? Gipasibya n'yo siya diha sa telebisyon, gipakaylap kini sa tibuok nasud, oh, grabe, ginasulayan ang kasarang sa paghunahuna tali sa duha ka presidente nga pagapilian. Aron mamahimong...Gipili n'yo ang usa nga gihunahuna ninyo nga adunay utokan nga panghunahuna, ug wala n'yo gilantaw kung unsay anaa sa luyo niini.

¹⁷¹ Nakita ba ninyo kung unsa ang naangkon ninyo tungod sa inyong paghangyo-hangyo? Uh-huh. Uh-huh. Oh, Pasko na usab. Oo, naangkon sa Amerika ang iyang mesias, unsa ma'y inyong buhaton kaniya? Tan-awa n'yo siya kung unsay buhaton niya kaninyo. Hinumdumi ninyo mismo, sama ra sa gibuhat ni Hitler kaniadto sa Germany. Hinumdumi lang, timan-i n'yo kana. Naka-teyp kini. Oo. Naangkon n'yo kini. Bisan pa niana, daghan pa sa gihapon ang nahabilin gikan niining mga rebaybal nga mikaylap sa tibuok nasud, disente gayud nga mga tawo nga may kahadlok-sa-Dios ang panghunahuna, nga mao unta'y nagpahigayon sa maong butang ug nagpapabilin pa niini. Pero nag-imbento kamo mismo, pinaagi sa inyong mga mekanika, usa ka makina nga arang makapanikas og boto, ug gimantala kini sa inyo mismong mga mantalaan sa tibuok nasud, ug wala gyud kamo'y gibuhat bahin niini aron itul-id kini. Ug naangkon n'yo kini. Ingon niana man gud ang matang sa mesias nga gusto nila, busa siguro nakapahiluna na sila, aduna na sila'y utokan, usa ka utok, sigurado, maantigo, hataas og iniskwelahan.

¹⁷² Ug nasayod gayud kamo sa—sa gitudlo sa inyong Ginoo, nga ang dautan nga mga tawo sa panahon, ug sa matag panahon, sa una pa'y mao gyud ang maantigo nga mga tawo. Wala ba mo mahibalo nga ang mga kabanay ni Cain mao ang nahimong mga siyentista ug mga tawong utokan, samtang ang mga tawo sa Dios nga magbalantay lang ug uban pa, hangtud niadtong pagkalaglag? Ug sila nga mga ubos nga mga mag-uuma ug uban pa ang nangaluwas didto sa arka, ug ang mga utokan ang nalaglag. Wala ba mo mahibalo nga miingon si Jesus, “Ang mga anak sa niini nga panahon, niining kalibutana, mao'y—mao'y—mao'y mas maalamon ug mas utokan kaysa sa mga anak sa Gingharian”? Ngano man? Mga karnero man gud sila, nagkinahanglan pa sila og usa ka tigpanguna. Ug samtang ang mga tawo ginapili nila ang ilang tigpanguna pinaagi og mga intelektuwal, ginahimo kana sa mga maantigo; apan ang ginapili

sa mga mapainubsanon nga ilang tigpanguna, mao mismo ang Espiritu Santo. Ingon niana gayud ang gibuhat sa iglesia, gipili sa iglesia ang mga higante nga denominasyon; samtang, gipili sa tinuod nga Lawas ni Cristo ang Balaang Espiritu ug ang Iyang Pulong. Nagadepende ra kung unsa ang ginatugotan ninyo nga mao'y manguna kaninyo. Kinahanglan pa sa usa ka karnero nga mapangunahan, ug dinha kita napahimutang.

¹⁷³ Karon naangkon na nila ang ilang mesias, ang ilang dinihogan nga magtutudlo, nga maantigo, maalamon. Oh, grabe! Wala pa gayu'y presidente nga mibarug nga ingon ka maantigo sama niadtong nga tawo. Aba, motindog siya mismo ug ibutang ang. . . Mahimo, siguro karon o unyang gabii, o sa sunod adlaw o makaduha, Nadungog ko kini nga gipasibya niadtong miaging adlaw, nga, ipangutana lang kaniya ang bisan unsang pangutana nga gusto ninyo. Oo, usa mismo—usa ka edukadong makina, mao kana ang gisaligan sa Amerika, karon tan-awon nato kung asa kamo modangat niini. Uh-huh.

¹⁷⁴ Imong gisalikway, Amerika, imong gisalikway ang Mensahe ni Cristo, inyong gisalikway ang Espiritu Santo nga gipanghimatud-an sa inyong atubangan, bisan sulod sa inyo mismong mga kapitolyo, kon diin gipakita sa gahum ni Cristo ang Iyang Kaugalingon, nga nasayod sa mga hunahuna sa tawo, nga mahimo Niyang ayohon ang mga may sakit ug arang hibaloon ang mga tinagong bahin sa kasingkasing, ug eksaktong ginabuhat kung unsay gisulti sa Dios nga mahitabo sa kaulahiang mga adlaw, ug ginabalibaran ninyo Kini. Tungod kay dili Kini pinasinaw. Natawo Kini diha sa usa ka pasungan. Mabaho Kini, para sa nasud. Ug, hinumdumi, ang inyong pulitika ug iglesianismo baho na kaayo sa atubangan sa Dios, usab. Gusto sa Dios ang matam-is nga kahumot sa pagkamapaubsanon. Dili kana gusto sa iglesia, kana ang mini nga pagpaubos. Gusto sa Dios ang matuod nga pagkamapainubsanon. Mao kana'y Iyang gusto. Karon aduna na sila'y ilang edukado nga higante.

¹⁷⁵ Ang iglesia, nagatinguha kini og usa ka mesias. Bueno, unsa man ang gusto niini? Nagatinguha kini og usa ka utokan, denominasyonhong sistema, usa ka dinihogan aron—aron dalhon sila sa usa ka dapit. Tugoti n'yo ako nga mogahin og oras dinhi, aron masigurado ninyo nga modangat gyud kini dinhi ug sa gawas sa nasud. Ang gusto sa iglesia sa karong panahon mao'y usa ka dinihogan nga utokan nga nahan-ay na ang tanan aron puede silang magkinabuhi sa kalibutan, nga mahimo sa mga kababayan-an nga putlan ang ilang buhok, pintalan ang ilang mga nawong, mahimo sa mga lalaki nga magminyo sa makaupat o makalima ka higayon ug mamahimong mga diyakono sa gihapon, oh, mahimo nila ang unsa mang butang nga gusto nilang buhaton ug ipapabilin gihapon ang ilang pagpahayag ingon nga "Cristohanon." Maangkon gyud ninyo kana!

¹⁷⁶ Dili man gud ninyo gusto ang Mesias nga iya sa Dios, ang dinihogan nga Pulong, ang Pulong nga napadayag, ang Pulong nga nagapadayag sa Kaugalingon Niini. Dili n'yo kana gusto. Gipadala Kini sa Dios para kaninyo. Apan dili gusto sa iglesia Kana. Ang gusto nila mao ang ilang kredo ug gusto nila ang usa ka tawong utokan nga makahimo sa paghan-ay sa mga kredo diin ang tanan moyukbo niini. Maangkon ninyo kana, uh-huh, nagapaingon na. Daghan kamo og mga anak niini, apan adunay motungha nga usa ka lolo usa sa niining mga adlaw, usa ka Faraon nga wala makaila kang Joseph. Ug mao kana ang inyong gusto, mao kana ang gusto sa iglesia. . . Makita ninyo ang paagi mismo nga ilang ginabuhat, oo, sir, ang paagi mismo.

¹⁷⁷ Tataw kini nga ginasaysay sa Pinadayag 17, mahitungod sa tigulang nga bigaon ug iyang mga anak nga babaye. Eksakto. Ug mangbalik kini tanan ngadto sa mama, ug paingon na kini mismo karon aron maghimo og usa ka pangtibuok-kalibutan nga iglesia. Maangkon gayud ninyo, nga mga denominasyon, kung unsay inyong gusto. Paminawa n'yo ako! Mahitabo gyud kana nianang panahona! Ug tingali'g mitaliwan na ako nianang panahona. Apan kadtong dili modawat niana sa diha nga hinay-hinay nang nagakapalong ang pang-gabii nga mga Kahayag ug mawala na, magalingi-lingi sila, makita nila nga gipangpugos sila ngadto sa usa ka butang pinaagi sa ilang denominasyon, ug gidawat kana sa ilang denominasyon aron masalbar sila sa kaulawan. Nga, buhaton nila kini tanan. Apan kadtong mga tawo nga dili gusto niana nga sistema, nga gidawat ang sistema sa Dios, ang Balaang Espiritu ug ang Pulong, moingon sila, "Siguradong husto gyud kanang tawhana." Tingali'g ulahi na kaayo nianang higayona.

¹⁷⁸ Makita nato ang mga Episcopalian, mga Presbyterian, mga Baptist, ang tanan nagatambong na mismo sa Full Gospel Business Men, ang tanan naningkamot na sa pagpangita sa Espiritu Santo. Wala ba naamgo sa mga tawo nga mao na mismo kana ang takna nga miabot ang Pamanhonon, sa higayon nga naningkamot na ang nagakatulog nga dalagang ulay nga moadto ug mopalit og lana? Mao kana ang higayon nga miingon si Jesus nga miabot na ang Pamanhonon ug misulod, ug wala sila makasulod. Unsa ba'y nagakahitabo niining mga kalalakin-an? Nagabatok mo niana, sa dihang ginapamatud-an na sa Biblia nga wala sila nakasulod? Ug samtang nagapaningkamot sila nga buhaton kini, miabot ang Pamanhonon, ug gitambog sila ngadto sa kangitngitan sa gawas. Unsa man kana? Mahimong anaa kanila ang tanan nang matang sa mga emosyon, tanan nang matang sa mga pagpakaaron-ingnon, tanan nang matang sa—sa mga sensasyon nga daw sa ebidensya kono niini, apan selyado na ang Iglesia ug gilalin na Siya. Uh-huh. Mahimong propesiya na kana.

¹⁷⁹ Gusto nila ang usa ka butang, gusto nila og usa ka butang

nga puede lang sila magkinabuhi sa unsa mang paagi nga gusto nila. Sila, mao kana ang ginapangita sa kalibutan sa iglesia. Usa ka tawo nga—nga mahimo nilang motambong sa pinakadakung iglesia sa siyudad kon diin miyembro ang tanang mga bantugang tawo sa siyudad. Nga anaa kanila ang pinakataas nga bilding. Nga anaa kanila ang pinakanindot nga organ. Nga aduna sila og—og hataas nga mga lingkoranan. Nga anaa kanila ang usa ka ministro nga dili mosulti kanila og bisan unsa mahitungod sa ilang pagkinabuhi, kung gusto man nilang mosayaw, kung gusto nilang magpasundayag og usa ka matang sa pagpasundayag, kung gusto nilang magsul-ob og purol, kung gusto nilang putlan ang ilang buhok, o kung gusto nilang buhaton kining mga butanga, mahimo gani nilang manigarilyo, o mag-inom og ilimnong makahubog nga pagpakig-uban lang. Ingon na niana ang mga gawi sa mga iglesia. Moderno lang kono nga pag-inom, ginatudloan ang inyong mga anak sa pag-inom, basta dili lang kono sobra, dili lang kono magpalabi niini. Manigarilyo, apan dili—dili lang kono magpalabi. Magsul-ob og bisan unsa nga gusto ninyo, basta—basta paningkamotan lang nga ipapabilin ang inyong kaugalingon nga ingon ka disente sumala sa inyo nang nahibaloan kung unsaon paghimo. Kita n'yo? Oh, grabe nga pagpakaaron-ingnon! Nianang dinihogan nga yawa! Nianang butang nga gitawag og denominasyon! Nianang butang nga gitawag og relihiyon! Iya kana sa yawa. Balik mo kang Cristo ug sa Iyang Pulong! “Luwasa ang inyong kaugalingon gikan niining kaliwatan nga baliko.” Maghinulsol kamo, ang matag usa kaninyo, sa dili pa ulahi ang paghinulsol, ug mamaingon gyud niana kini unsa mang orasa.

¹⁸⁰ Pag makita na nato ang nagakatulog nga dalagang ulay nga nagalihok na nga ingon niana, mora'g angay gyud nga mahadlok na ang mga tawo. Apan imbis nga ingon niana, sila, “Oh, himaya, dili ba pagka-kahibulongan niini! Alleluyah!” Oh, grabe! Grabe na gyud kahalayo ang nadangatan sa mga tawo? Uh-huh. Unsa na nga matang sa kahimtang ang ilang nadangtan tungod sa ilang pulitikanhong panghunahuna, tungod sa ilang modernong panghunahuna, nga wala gyu'y nahibaloan mahitungod sa Pulong sa Dios sama sa usa ka hottentot nga walay nahibaloan mahitungod sa kabalyerong Egiptoanon. Husto! Usa—usa lang ka teolohikanhong panghunahuna bahin niini, o usa ka pang-sikolohiya lang nga butang nga gipresentar kanila pinaagi sa usa ka kredo o kung unsang butang, ug nahimong salawayon ang Pentecostal tungod niini. Pasayloa ko nianang maong sinultihan. Daghan niini nga butang mahitungod sa mga babayeng magwawali ug uban pa, mao'y mga ehemplo ra niana. Husto! Tan-awa. Mga pagsayaw-sayaw, rock-and-roll, edukasyon, mao kana ang matang sa—sa iglesia nga gusto sa kalibutan. Ingon-ana nga matang sa Mesias ang gusto nila, usa nga mao'y makapahiusa kanila. Makaangkon gyud kamo og ingon-ana. Uh-huh. Ang espiritu niini nagapamuhat na taliwala

sa mga anak sa tawo. Tinuod. Pero nagapamahayag gihapon og pagka-Cristohanon, maangkon gyud nila kana.

¹⁸¹ Gipadala sa Dios kanila, gipadala sa...kanato sa 1963, kung ipadala sa Dios kanato sa 1963, ang mao ra nga pagdihog nga Iyang gibuhat kaniadto sa sinugdan, balibaran gihapon nato kini sama sa ilang gibuhat kaniadto. Tungod kay, kung kanang dinihogan nga, mesias, moabot man sa iglesia, nan mamahimong mao ra sa gihapon siya sumala sa giingon sa Biblia kung unsa Siya kaniadto. Mga Hebreohanon 13:8, nag-ingon Kini, “Si Jesus Cristo mao sa gihapon kagahapon, karon, ug hangtud sa kahangturan.” Dayon kung mag-ampo kita para sa usa ka mesias, usa ka dinihogan, unsa man, gusto ba nato og usa ka relihiyosong pulitiko? [Nagaingon ang kongregasyon, “Dili.”—Ed.] Gusto ba nato og usa ka utokan nga sundalo? [“Dili.”] Gusto ba nato og usa ka edukadong siyentista? [“Dili.”] Ug ang gusto ninyo usa mismo ka Cordero. [“Amen.”] Gusto n’yo og usa ka Cordero nga mao’y magpabalik kaninyo, nga walay paghimaya para sa ilang mga kaugalingon, kondili kita’y igabalik mismo sa Pulong. Ipabalik! Usa nga isulti gyud kaninyo ang Kamatuoran bisan unsa pa kini, kita n’yo, nagapabilin niini, nagalinya niini. Pero ayaw nila niini. Kung moabot Siya karon Niya’y mamahimong sama gihapon sa kung unsa Siya kaniadto, magpabilin gayud Siya nga eksakto sa Pulong sa Amahan. Siguradohon gyud Niya nga ang matag Pulong nga gisaad diha sa Biblia mapadayag mismo ngadto sa mga anak sa tawo. Eksakto gayud.

¹⁸² Miingon si Jesus, “Kinsa ba ang makapamatuod Kanako mahitungod sa sala? Kinsa ba ang makapasangil Kanako og sala, og dili-pagtoo? Kung ang tanan nga wala gisulti sa Amahan nga Akong pagabuhaton, kung wala Ko man gibuhat nan isulti n’yo Kanako kung diin Ako napakyas.” Amen. “Sultihi n’yo Ako kung asa Ako kulang.” Amen. Kabalo na mo, ang sala mao ang dili-pagtoo. Husto. Nasayod kita niana. “Kinsa man ang makapakita Kanako kon diin wala Ko tumana,” ingon Niya, “ang matag Pulong nga gisulti sa Amahan nga Akong pagabuhaton? Kinsa ang makatudlo Kanako ug moingon nga wala Ko kini gibuhat? Kinsa man kaninyo?” Kung ingon-ana nganong wala na lang nila Siya gipasagdan? Tungod kay gipropesiya na man nga buhaton nila kana. Mao nga tumanon gyud Niya ang Pulong sa Amahan nga eksakto mismo sa gibuhat Niya sa sinugdan kaniadto. Tumanon gayud Niya nga ingon ka eksakto, tungod dili man Siya mahimong mausab, tungod kay ang Dios mao ang Pulong. Tungod kay ingon niana gyud mismo Siya, Siya mao ang Pulong. Ug Siya mao ang Pulong nga unsa? Siya mao ang Balaang Espiritu nga ginakuha ang Pulong sa Dios ug ginapadayag Kini. Eksaktong ingon niana si Jesus Cristo... Sa dihang ang Dios nga Espiritu, ang Amahan, nahimong unod sa taliwala kanato diha sa porma sa Iyang Anak, Iyang gikuha

ang Pulong sa Dios ug gipadayag Kini, gipakita Kini ngadto sa mga tawo, pero dili nila gusto og ingon niadto. Aduna man gud sila’y kaugalingon nilang mga kredo, aduna sila’y kaugalingon nilang mga denominasyon, ug sukwahi kadto sa tanan nilang denominasyon, busa wala nila Kini gidawat.

¹⁸³ Ug mamahimong ingon niana sa gihapon karong panahona. Kung moabot man ang Mesias, kuhaon gyud Niya ang mga butang nga gikasaad sa Dios dinhi, ug kining mga ania sa Biblia, ug ipadayag ang mga niini sa atubangan sa mga anak sa tawo, ug isalikway Siya sa matag denominasyon. Dili nila gusto Kini. Ayaw nilang magkaadua og unsa man nga kahilambigitan Niini. Apan mao—mao man kana ang ipadala sa Dios kanila. Kung magpadala man Siya kanila og unsa man, siguradong mao gyud kana. Ug dayon kondenahon nila kini ug magahatud kini og silot ngadto sa ilang kaugalingon, sa niini nga kaliwatan sa mga tawo, sama ra sa gibuhad sa mga Judio niadtong panahona, ug sa tanang uban pa kanila. Oo, sir. Kabalo ba mo kung unsay Iyang buhaton kung moabot ang Mesias sa 1963, kabalo ba mo kung unsay Iyang buhaton? Gub-on Niya ang matag denominasyon nga aduna kita. Watas-watson gyud Niya ang maong butang ngadto sa yuta.

¹⁸⁴ Bueno, moingon sila, “Unsa ma’y Iyang buhaton, Doktor *Ingon niini-ug-ingon niana* o Doktor *Ingon niini-ug-ingon niana*?”

¹⁸⁵ Moingon Siya, “Ang yawa mao ang inyong amahan, ug ang iyang mga binuhatan inyong pagabuhaton.” Ingon niana mismo ang Iyang isulti. Dili Siya magpugong-pugong sa pagkondena kanila sa unsa mang paagi. Wala Siya nagpugong-pugong kaniadto sa sinugdan, ug Siya mao ra sa gihapon karon sama sa kung unsa Siya kaniadto. Ang bisan unsa man nga sukwahi sa Pulong, tawgon Niya kini nga ingon niana. Moingon Siya, “Ang yawa mao ang inyong amahan, ug ang iyang mga binuhatan inyong ginabuhat. Nagabuhat og mga butang nga supak sa Iyang Pulong.” Husto. Ug ang ilhanan nga iya sa Mesias maganunot Kaniya. Husto kana. Motindog Siya ngadto kanila ug moingon, “Dili ba gituman Ko man kining nahitabo? Kinsa ba kaninyo ang makahukom Kanako og silot tungod sa dili-pagtoo?” Kita n’yo?

¹⁸⁶ Apan paningkamotan nilang himoon Siya nga usa ka pahoy, dalhon Siya gikan sa usa ka lugar ngadto sa usa na usab ka lugar sama sa gibuhad niadtong Fariseo. Gidala Siya didto aron himoong kalingawan, aron palibotan og daghang mga bisita, pamatud-an nga dili Siya usa ka Propeta. Kabalo na man mo sa estorya nga akong gitudlo mahitungod niana. Kita n’yo, mao ra sa gihapon ang buhaton nila karon nga magakatigum para sa ilang kalingawan, mao ra gihapon ang buhaton nila. Ug moadto gihapon Siya. Alleluyah! Moadto Siya, tungod kanunay man Siyang moadto kon diin Siya ginadapit. Bisana nasayran na Niya kung unsay buhaton niadtong Fariseo. Nasayran na Niya nga

dili gyud Siya kinahanglanon niadtong Fariseo. Nasayod Siya nga adunay sekreto nga plano sa kon asa man. Ingon nga wala ma'y unsa mang kahilambigitan Kaniya kadtong mga Fariseo, gikapungtan nila Siya. Ug gusto ra niining tigulang nga si Simon nga moadto si Jesus didto aron nga makaawhag Siya og daghang mga tawo ngadto sa iyang dapit. Apan nasayod na si Jesus niadto. Misulod Siya. Gihatagan ba Siya og pagtagad sa maong Fariseo? Ang mga tawong hataas og katungdanan mao'y iyang gihatagan og pagtagad. Milingkod na lang si Jesus didto nga wala nahugasan ang mga tiil. Mao ra sa gihapon sa karong panahon. Ayaw nila kang Cristo. Ayaw nila sa pamaagi sa Dios, nakita n'yo.

¹⁸⁷ Oo, moingon si Jesus, "Ang yawa mao ang inyong amahan." Ug ginatuman sa niadtong mga tawo ang mga balaod ug mga ingon-anang butang ug tanan na sa ilang denominasyon ug mga kredo, sa bug-os gayud, nagahugas sila og mga kolon. Ug miingon si Jesus, "Giaplikar n'yo ang inyong mga kredo ug gihimo n'yong walay-epekto ang Pulong sa Dios, tungod sa inyong mga tradisyon." Ug nagaingon dinha ang Mga Hebreohanon 9:12, nagatoo ko, dili, sa Mga Hebreohanon 12 diay . . . dili, 9:12, sa hunahuna ko, mora'g dinha mismo, gisulti niya nga "Sa dihang nahinloan na kita ug gipasaylo na, kita gihinloan na gikan sa patay og karnal nga mga buhat." Ug sa dihang gipasaylo na gayud kita sa atong mga sala pinaagi sa Dugo ni Jesus Cristo, mosulod kanato ang Espiritu Santo ug patay na kita sa karnal nga mga buhat. Oh, kamong Pentecostal nga iglesia, nganong nakahimo man mo og ingon niana nga kasaypanan? Kamong mga buta nga nagaagak sa mga buta! Wala ba mo mahibalo nga migawas na kamo gikan niana singkuenta na ka tuig ang milabay, ug unya ipabalik ra diay kining pundok sa mga tawo ngadto niana? Dili ba ninyo madungog ang Pulong sa Ginoo? Mga uga nga bukog, unsa ma'y nahitabo kaninyo? Ayaw ninyong dawaton kung unsa ang gipadala kaninyo. Wala nila gidawat kaniadto, dili gihapon nila dawaton sa karon.

¹⁸⁸ Karon, unsa ma'y nahibaloan ninyo? Usab, busa ang iyang mga plano usab ug mga plano sa kalibutan sa denominasyon ug kredo, nagakalumpag na. Nagakalumpag na ang mga plano sa tawo. Wala kita sukad gitanyagan sa Dios og usa ka kredo. Wala Siya sukad nagtanyag kanato og usa ka denominasyon. Gusto kong adunay mopakita kanako diha sa Biblia kon diin gibuhad Niya kana. Mahimo kong ipakita kaninyo kon diin Niya gisulti nga dili ninyo kana buhaton. Ipakita n'yo kanako kon diin Niya gisulti nga buhaton kana. Moingon mo, "Kung ingon-ana, Igsoong Branham, unsa ma'y gitanyag ni Jesus sa tawo?" Usa ka Gingharian. Alleluyah! Ug Siya mao ang Hari, Hari sa mga balaan, Ginoo sa mga ginoo. Nagtanyag Siya kanato og usa ka Gingharian. Dili og usa ka pulitiko, sistema sa denominasyon; kondili usa ka Gingharian. Miingon Siya kang Pilato . . . Miingon

si Pilato, “Ikaw ba ang Hari sa mga Judio?”

¹⁸⁹ Miingon Siya, “Ikaw ang nagsulti niana.” Miingon Siya, “Kung ang Akong Gingharian sa niini pa nga kalibutan, nan ang Akong mga sakup makig-away alang Kanako, apan ang Akong Gingharian atua man sa Itaas.”

¹⁹⁰ Ug ngano man nga magakupot pa kita niining mga butang nga iya sa kalibutan sa dihang mga anak man kita sa Gingharian nga anaa sa Itaas? Kita n’yo? Aduna gyu’y sayup sa kung asa man. Apan wala kita gitanyagan og usa ka sistema. Wala pud kita gitanyagan og usa ka organisasyon, wala kita gitanyagan og usa—usa ka pulitikanhong pagdumala sa kalibutan, kondili gihatagan kita og usa ka Gingharian sa kaaghop, ingon nga ang Kinabuhi sa Cordero ania kanato. Dili na iya sa kalibutan, dili na kamo iya sa kalibutan. “Mga anak, dili kamo iya sa kalibutan. Ginaampo Ko, Amahan, ingon nga Ako dili iya sa kalibutan, sila usab dili mamahimong iya sa kalibutan.” Kita n’yo? Mao kana ang giampo ni Jesus alang kanato. Ug bisan pa niana nagabalik hinoon kita ug ginapahimutang ang atong kaugalingon sa mga kalibutanong pagpakighilambigit diin ang tanang matang sa mga tawo ginapangdapit. Karon, kabalo mo walay iglesia sa kalibutan nga dili puno sa mga hipokrito. Ug miingon si Jesus, “Ayaw kamo pagpahiangay sa inyong kaugalingon taliwala sa mga dili-magtotoo.”

¹⁹¹ Busa nganong magpakig-uban man mo sa usa ka organisasyon nga unta gitanyag na man sa inyo ang Gingharian sa Dios nga sulod niini kamo natawo? Ug wala gyu’y hipokrito sulod niini! Ang tanan putli, og walay-sambog nga mga anak nga lalaki ug mga anak nga babaye sa Dios, nga nagatoo sa Iyang Pulong gikan sa Genesis hangtud sa Pinadayag ug nagapabilin gyud Niini. Ug ginapamatud-an kini sa inyong kinabuhi, ug ginapanghimatud-an sa Dios ang Iyang Pulong ngadto niini. Mao kana ang Mesias. Mao kana ang Asawa sa Mesias. Ug nagpahimutang ang Dios sulod nianang sistema og mga magtutudlo, mga pastor, mga propeta, ug uban pa, aron mapapabilin nga matarung ang Iyang pagka-Mesias dinha, nga wala nasagolan og mga kredo sa denominasyon, kondili ginaibot kana nga butang ug ginapapabilin nga putli ang Iglesia, nga walay-sambog diha kang Cristo ug sa Iyang Pulong.

¹⁹² Sa hunahuna n’yo dawaton kaha kana sa iglesia? Ipalagpot nila Kini pagawas. Ayaw nilang magkaaduna og unsa man nga kahilambigitan Niini. Aduna sila’y kaugalingon nilang pulitikanhong sistema. Ug maingon nga adunay tawong utokan ang Estados Unidos, mao man usab ang iglesia nga magkaaduna kini og tawong utokan. Makaangkon kini, matikdi lang ninyo. Nagapaingon na mismo karon. Nahilambigit na nila ang ilang kaugalingon ngadto niini.

¹⁹³ Apan aduna kita’y usa ka Gingharian, ug sa niini nga

Gingharian aduna kini’y Kinabuhing Walay Katapusan. Dili pagpamiyembro, kondili Kinabuhing Walay Katapusan. Ug gipangulohan kini sa usa ka Eternal nga Hari. Usa ka Eternal nga Gingharian nga puno sa Kinabuhing Walay Katapusan, nga ginakontrolar sa usa ka Eternal nga Hari, alang sa usa ka Eternal nga katawhan nga gipili-nang-daan sa wala pa ang pagkatukod sa kalibutan. “Kay kadtong Iyang mga giilang-nang-daan, Iyang gitawag; ug kadtong Iyang mga gitawag, Iyang gimatarung; ug kadtong Iyang mga gimatarung, Iyang gihimaya,” Mga Hebreohanon 11. Husto kana.

¹⁹⁴ Karon, nagadepende gihapon sa kung unsa ang inyong ginapangita. Kung kamo si Abraham, nagapangita kamo niana nga Gingharian. Mahimo kong ipakita kini sa inyo karong buntaga. Oo, sir. Bueno, usa ka Eternal nga Gingharian nga puno sa Kinabuhing Walay Katapusan, nga ginakontrolar sa usa ka Eternal nga Hari pinaagi sa Iyang Eternal nga Pulong, alang sa usa ka Eternal nga katawhan nga gipili-nang-daan. Mao kana. Ngano man? Ingon na niana sa una pa, og kanunay na gyud nga ingon niana, walay sinugdanan o katapusan man. Sa hunahuna sa Dios kini atua na sa mismong . . . kaniadtong kauban na kini sa Dios sa Walay Katapusan. Ug matuman gayud ang katuyoan sa Dios.

¹⁹⁵ Bueno, nagakalumpag na kining kalibutana. Pasagdi lang siya nga malumpag, okay ra kana, mahitabo man gihapon kana. Unsa ma’y gisulti ni Miqueas dinhi, unsa ma’y gihisgotan ni Miqueas dinhi? Ang mga bukid malaya, kini modagayday sama sa talo ug mobuhagay nga sama sa usa ka—usa ka glacier nga nagasidlit, o usa ka matang sa geyser, diay. Malaya kini ug malumpag, apan si Jehovah magapabilin sa gihapon hangtud sa kahangturan. “Ang tanan nga unod balili, ang gininhawa sa Dios nagahuyop sa ibabaw niini bisan pa kung bulak kini, balili man, unsa man ka maanindot, nagakalaya kini; apan ang Pulong sa atong Dios nagapabilin hangtud sa kahangturan,” Ang Isaias 40 nga nagapropesiya mahitungod sa pag-abot sa Mesias, ang nagsulti niana. Ang tanan ninyong mga kredo, mga sistemang pang-denominasyon, mga magtutudlo, mga tawong utokan, ug tanan nang uban pa, mangahanaw gayud, apan ang Pulong sa Dios magapabilin hangtud sa kahangturan. “Ibabaw niining bato pagatukoron Ko ang Akong Iglesia, ang mga ganghaan sa hades dili gayud makabuntog Niini.”

¹⁹⁶ Ania kita sa panahon sa Pasko. Wala ko kabalo nga moabot diay kita sa niining orasa karon. Nagakawala man gud ko pag mahunahuna ko ang panginahanglanon niining panahona. Dalion na nako. Oo. Ug natawo kita pasulod niini nga Gingharian ug mahimo nga . . . kita—kita nga mga Cristohanon nga nagatoo ug ania niini nga Gingharian. Karon, dinha sa Basahon sa—sa Mga Hebreohanon, nabasa nato kaganina, “Kay magadawat kita og usa ka Gingharian.” Dili nga modawat

og kredo, dili nga modawat og sistema. “Magadawat kita og Ginghamarian nga dili matarug.” Nagakalumpag na ang kalibutan. Tinuod kana. Ug ang matag pulitiko, matag denominasyon ug matag iglesia mangapukan og mawatas-watas gayud, apan magadawat kita og usa ka Ginghamarian nga dili matarug. “Kay kung kadtong mga nagsalikway Kaniya Nga nagsulti gikan sa Bukid sa Sinai, ug ang yuta natay-og ilalum sa Iyang Tingog, labi pa nga siguradohon ninyo nga wala ninyo ginasalikway” (si kinsa man?) “Siya, ang Iyang Pulong nga nagasulti gikan sa Langit, gikan sa Iyang Ginghamarian, kay anaa kita sa usa ka Ginghamarian nga dili matarug.” Amen. Ang tanan nga anaa sa gawas niana . . . Gipadala sa Dios ang tanan-tanan, gibuhat Niya kini nga mahuyang aron mabungkag kini. Sa mahuyang nga kahintang niini sama niana, siguradong magun-ob gyud kini. Mahuyang man kini. Apan, hinumdumi n’yo nga aduna kita’y usa ka Ginghamarian nga lig-on ha, sa diha nga ang tanang uban pa mangalumpag ug mangahanaw. Dili ikatingala nga miingon si Eddie Perronet, “Kang Cristo ang malig-on nga Bato ako nagabarug, ang tanang ubang mga dapit balas lang nga nagakaunlod.” Usa mismo ka Ginghamarian! Dili nga usa ka pulitikanhong sistema, dili usa ka sistema sa pulitika, dili usa ka sistema sa iglesia, dili usa ka sistemang pang-denominasyon; ang tanan niini nangahimong mga Fariseo ug mga doktor sa yawa. Apan magadawat kita og usa ka Ginghamarian, usa ka Eternal nga Hari Nga mao ang Eternal nga Pulong, Nga adunay Kinabuhing Walay Katapusan; pinaagi sa Iyang Eternal nga Pulong alang sa Iyang Eternal nga katawhan nga adunay Kinabuhing Walay Katapusan, ug mga umalambit kita niini. Oh, pagkanindot! Mao kana mismo.

¹⁹⁷ Karon, ang bisan unsa man nga nagabira kaninyo palayo Niana sayup gayud, usa kana ka mini nga mesias, usa ka mini nga pagdihog. Oh, ingon niya, “Ang maong igsoon aduna man og ingon niana nga pagdihog!” Unsa man nga matang sa pagdihog? Mao kana. Si Hitler aduna ma’y pagdihog, usab. Si Khrushchev aduna man, usab. Si Papa Pius aduna pu’y usa, usab. Unsa man nga matang sa pagdihog ang anaa kaninyo? Kung dili kini dinihogan niining Pulong ug ginapanghimatud-an ang matag Pulong nga mao ang Kamatuoran, nan biyai kini. Sayup. Kung wala kini nagapamunga mismo, kung ingon-ana wala kini’y kinabuhi. Igapakita niini ang kolor niini. Oh, moingon, “Apan alang man Kana sa laing kapanahonan. Atong. . .” Biyai kana nga butang. Si Jesus Cristo mao sa gihapon kagahapon, karon, ug hangtud sa kahangturan. Oo, sir.

¹⁹⁸ Busa sa diha nga nagakalumpag na kining kalibutana, natawo kita ngadto sa usa ka Ginghamarian nga dili mahimong malumpag. Nagatoo ba kamo nga nagakalumpag na ang kalibutan? Nagakalumpag na ang mga sistema niini. Nagatoo ba kamo niana? Nagatoo ba kamo nga ang—ang sistema sa

ekonomiya nagakahugno na? Nagakahugno na ang sistema sa pulitika. Ang nasudnong, ang sistema sa UN nagakahugno na. Ang iglesia nagakahugno na. Ang mga denominasyon nagakahugno na. Ang tanan-tanan nagakahugno na. Apan aduna kita'y usa ka Gingharian nga dili matarug, kana mao ang Eternal nga Gingharian sa Dios, dili kini matarug.

¹⁹⁹ Gikasultihan kita nga ang bag-ong sistema niining denominasyon, sa pagpahayag niining World Council of Churches, magahatud kono og pakigdait sa yuta. Daw sa unsa—daw sa unsa ka pagbaliwala, daw sa unsa ka—ka dakung laparo sa atubangan ni Cristo! Daw sa unsa ka walay-pagtahud, panamastamas nga butang kana! Iya kana sa yawa. Ang tawo makahimo man sa pag-organisa og usa ka butang nga mas labaw pa kay sa mahimong ipadala sa Dios kanila? Ang tore sa Babel! Usa na usab kini ka Babilonia nga siguradong malumpag gayud. Pakigdait sa yuta? Usa ka mini nga mesias! Anti-cristo ang pagpanudlo niini. Unsaon man ninyo paghiusa kining mga denominasyon sa diha nga dili na gani sila... Dili gani sila magkauyon sa usa'g usa karon sa diha nga nagkabahinbahin sila ngadto sa ginagmay'ng mga sistema nga sama niana, unsa pa kaha ang pagkahiusa sa tanan ug sa pag-adto didto? Oo. Kita n'yo, usa kini ka mini nga sistema. Gihimo ang tanan niini aron ipasulod ang Protestantismo ngadto sa Romanismo. Usa ka mini, anti-cristo nga pagtulon-an.

²⁰⁰ Ang Gingharian sa Dios dili iya niining kalibutana. Mao kana'y giingon ni Jesus. "Ang Akong Gingharian dili iya niining kalibutana."

²⁰¹ Busa kung kana nga gingharian naorganisa sa niining kalibutan, usa kana ka mini nga mesias, kana nga mesias igatanyag ngadto sa iglesiang Protestante sa dili madugay, nga ilang pagadawaton, tungod kay ingon niana man ang ilang ginapangita. Ginapangita nila kini nga sistema nga makahimo og, "Bueno, karon, kita nga mga Methodist ug mga Baptist, sigurado, kami—medyo magkauyon gyud kita, kabalo mo. Kita—kita nga mga Presbyterian, kita nga mga Pentecostal, oh, unsa ma'y kalahian kanila, igsoon?" Aduna gyu'y kalahian! Gibuhat kamo sa Dios nga managlahi. "Apan, bueno, amo lang isakripisyo kini." Ug ang inyong halangdong pang-ebanghelyo nga pagpanudlo, isurender n'yo kana. Unsaon man ninyo pagpakig-uban sa nianang pundok nianang sa mga tawo nga wala nagatoo sa bisan unsa, ang uban gani kanila mga ateista? Ug mini nga mesias mao'y kung unsa kana. Husto. Oo, sir.

²⁰² Bueno, ang Gingharian sa Dios dili man iya niining kalibutana. Ug kaniadtong ania pa si Cristo, gihatag Niya kanato ang programa niini nga Gingharian. Gihatag Niya kanato ang programa sa Gingharian sa Dios, ang Gingharian sa Amahan, nga mao ang Iyang Pulong. Karon, kung gusto ninyong mahibaloan kung unsaon pagpakasulod ngadto nianang

Gingharian, anaa niini nga Pulong. Kung mosulod kamo sa laing pultahan . . . Kinahanglan nga mosulod kamo sa mao rang pultahan nga giagian sa tanang uban pa kanila. Kung sulayan ninyo nga maghimo og uban pang agianan pasulod, aba, sama ra kamo sa usa ka kawatan ug tulisan. Ug miingon Siya, “Ang si kinsa man nga magadugang og usa ka pulong ngadto Niini, o magataktak og usa ka Pulong gikan Niini, pagataktakon usab ang (iyang bahin) gikan sa Libro sa Kinabuhi.” Busa kon moingon ka nga ang imong ngalan anaa na sa maong Libro sa Kinabuhi, kung mao man, ayaw tugoti nga mataktak kini gikan niana.

²⁰³ Sa dihang, giablihan ni Pedro niadtong Adlaw sa Pentecostes ang pultahan pasulod sa Ginghamarian. Giablihan niya kadto. Bag-ohay pa lang natukod ang Ginghamarian didto sa Jerusalem. Gusto kong isulti kanako ni kinsa man nga ang Iglesia nagsugod didto sa Roma. Gusto kong adunay magpamatuod niana kanako. Wala gayud nagsugod ang Iglesia didto sa Roma, ang Iglesia nagsugod mismo sa Jerusalem. Gikatukod ang Ginghamarian niadtong Adlaw sa Pentecostes. Ug sa dihang gitinguha sa mga tawo nga makahibalo kung unsaon pagpakasulod ngadto niini nga Ginghamarian, miingon si Pedro, “Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala, ug madawat ninyo ang gasa nga Espiritu Santo.” Tungod kay mao man kana ang magpasulod kanila ngadto sa Ginghamarian. Ang bisan unsa man nga ubang pamaagi, pinaagi sa denominasyon o pagpakiglamano, o unsa pa man, mao’y mini nga mesias. Bisan unsa ka pa ka inila, ug unsa ka pa ka mahimong inila, ug tingali usa ikaw ka diyakono, bisan usa ka pa ka pastor o usa ka obispo, o elder o tigdumala sa estado, bisan unsa ka pa, mini gyud kana gawas kon mobalik ka sa mapaubsanon nga Cordero sa Dios ug sa Iyang Ginghamarian.

²⁰⁴ Karon matikdi. Ug gihatagan Niya kita og programa, ang Pulong sa Amahan. Ug ang matuod nga magtotoo nagapanghawid Niini, tungod kay dili niya kini mapugngan, ang Ginghamarian sa Dios kini nga anaa sa sulod niya. Ug sama ni Abraham, ginatawag niya ang bisan unsang butang nga sukwahi sa Pulong sa Dios ingon nga daw dili kini ingon niana. Ug kung aduna ma’y mosulti kaninyo nga ang denominasyon iya sa Dios, nan pagpabilin kamo nga sama ni Abraham. Kung adunay moingon nga kinahanglan n’yong mawisik-wisikan, o usa ka matang sa diyutay’ng butang, sistema man o butang nga sukwahi sa Pulong sa Dios, ayaw ninyo kana toohi. Isipa ninyo kana nga mora og wala. Kung moingon sila, “Bueno, karon, pinangga, dili man makadaut kanimo kon buhaton mo *kini*.” Ayaw ninyo kana toohi, sa diha nga ang Dios . . . Moingon, “Dili man makadaut sa mga kababayan-an kon putlan ang ilang buhok,” sa dihang nagaingon man ang Pulong sa Dios nga dulumtanan kana para

Kaniya, ang pagbuhat niana. Pag moingon mo, “Aba, karsones man ang ginasul-ob ko. Dili man purol ang ginasul-ob ko.” Ang ingon sa Dios nga ang usa ka babaye nga magsul-ob og bisti nga iya sa lalaki, kini usa ka dulumtanan alang Kaniya. Miingon ang Biblia nga sayup alang sa usa ka babaye nga putlan ang iyang buhok, dili gani angay alang kaniya nga mag-ampo ug uban pa nga sama niana. Bisan nga walay pandong ang iyang ulo, iyang ginapakaulawan ang iyang ulo. Ginadili gyud kana sa Dios! Ug kanang sistema nga nagaingon kaninyo nga okey ra ang pagbuhat niana, ayaw gayud ninyo toohi kana. Usa ra kana ka mini nga dinihogan. Mini kana nga cristo. Supak kana sa Pulong sa Dios. Ang mga matarung nagapanghawid gayud sa Pulong sa Dios tungod kay mao Kini ang programa sa Eternal nga sistema sa Dios.

²⁰⁵ Sa diha nga gibuhat sa Dios ang lalaki, gibuhat Niya siya sa usa ka paagi. Nagbuhat og usa ka babaye, gibuhat Niya siya sa lahi nga paagi. . . gihimo siya nga lahi na. Adunay duha ka managlahi nga mga pakigsaad, duha ka managlahi nga mga plano, duha ka managlahi nga mga plano tali kanila. Ug dili sila pareho kon tan-awon. Dili pareho ang ilang itsura, dili sila pareho manglihok, managlahi gyud sila. Pero ang mga kababayan-an nagapaninguha na nga mahimong sama sa lalaki, ug ang lalaki ingon na ka bayot nga mora na siya og babaye. Nakita ko ang usa ka batan-ong lalaki kagahapon, didto sa Cincinnati, nga mora’g kang Mrs. Kennedy, ang alut sa buhok, mora’g ingon niana. Gusto sa Dios nga ang lalaki sama gyud sa lalaki ang hitsura! Gusto Niya nga ang babaye sama gyud sa babaye ang hitsura!

²⁰⁶ Sultihan ko kamo, kining Jezebel nga sistema sa yawa mao ang nagadala sa tibuok kalibutan ngadto sa pagkadunot, wala na’y maayong dapit niini. Kini tanan mora na’g ginana nga mga samad, mga samad nga kanser, pagpangdaut nga iya sa yawa nga mao’y nagaut-ot sa pinaka-kinasuloran sa—sa mga sistema nga ilang gihimo dinhi. Si Satanas usa ka buitre nga nagaut-ut sa kaugalingon niyang gingharian. Usa siya ka yawa, mahugaw siya, siya mao ang—ang amahan sa bakak. Ginakaon niya ang unod sa kaugalingon niyang katawhan. Ang yawa!

²⁰⁷ Si Cristo mao ang Hari sa mga hari ug Ginoo sa mga ginoo, ang dinihogang Mesias. Ang magtotoo nagapabilin mismo nianang Pulong. Ang Dios ug ang Iyang Pulong Usa ra. Ako ug ang akong pulong usa ra. Ikaw ug ang imong pulong usa ra. Nan ayaw pagsalig, ayaw gamita ang kaugalingon n’yong mga panghunahuna; gamita ang Iyang panghunahuna, kung ingon-ana kabahin kamo sa Dios tungod kay ang Iyang Pulong ug kamo nahimo man nga managsama ra. Kita n’yo? Kung ingon-ana anaa na kamo sa Gingharian.

²⁰⁸ Gitawag ni Abraham ang bisan unsang butang nga sukwahi sa saad sa Dios nga daw sa wala kini. Oo, siya. . . sama sa mga

sistemang hinimo'g-tawo sa karong panahon, mao gihapon ang iyang pagabuhaton. Dayon ingon nga nakasulod na sa ingon niana nga gingharian. . . tapuson na nako, biyaan ko na lang ang pipila niining mga sinulat ug tapuson na. Tan-awa, kini. . . Ingon nga anaa na sa Gingharian, unsa ma'y nagakahitabo? Karon, kining tanan nga pagbadlong, apan may pagtahud ug may pagrespeto ug may pagkasinsero, sumala sa sugo nga gikahatag kanako pinaagi sa Pulong sa Dios, nga gihatag kanako sa Balaang Espiritu, sa pagbantay sa panon nga Iyang gipiyal kanako, nga magmatinahuron niini, magpabilin niini bisan unsa pa ang mahitabo, uyogon man kini sa tuo ug sa wala ug magpabilin gyud ko dinhi niining Pulong. Gikasugo kini. Dayon kung magadawat kita og usa ka Gingharian. . .

²⁰⁹ “Igsoong Branham, ang tanan niining uban pa nga mga tawo nagaingon, ‘Unsa man nga denominasyon ka miyembro?’”

Moingon, “Wala.”

“Unsa man ka?”

“Kay anaa man kami sa usa ka Gingharian.”

“Bueno, asa man kamo nagatagbo niini? Asa kamo nagaadto?”

²¹⁰ “Nagalingkod kami sa Langitnong mga dapit diha kang Cristo Jesus, og gibayaw ngadto sa Presensiya sa among Hari.” Ang Gingharian! Himaya! Karon hinay-hinay ko nang gibati ang pagkarelihiyoso. Ang Gingharian sa Dios kon diin nagakatigum silang tanan, ginabayaw sila sa Balaang Espiritu diha mismo sa Presensiya sa Hari, ug nagalingkod na kita sa Langitnong mga dapit kon diin kita gibautismohan ngadto kang Cristo Jesus. Dinha kita nahisakop.

²¹¹ Giingnan ko sa akong asawa sa dihang nangadto kami sa merkado, gisultihan ko kamo, niadtong miaging ting-init, nakakita kami og usa ka babaye nga nakabistida. Pagkatalagsaon gyud kon tan-awon. Talagsaon siya kon tan-awon. Kita n'yo? Miingon siya, “Nganong ingon-ana man? Kaila nato kining mga babaye. Ang uban kanila nagakanta sa mga choir nga duol ra dinhi.”

²¹² Oh, higala! Isulti ko kini, bisan nga gina-teyp kini, mas maayo nga isulti ko kini sa gihapon. Kabalo mo, ug ginasulti ko kini nga may pagtahod ug pagrespeto. Pabilin lang mo niini. Nakakita na kamo og linibo ka pilo nga miduol sa entablado, ug nakita n'yo kana sa matag higayon nga mosaka ko dinha nga walay bisan usa ka kapakyasan. Ug si Igsoong Arganbright dinhi nasayod sa bahin sa kalibutan nga among naadtoan, sa gawas sa nasud, wala ni usa ka higayon nga napakyas kini kondili ginasulti lang gyud kung unsa ang Kamatuoran. Sa dihang moadto ko niining mga dapita ug makita kining mga naka-toga nga mga choir, kadtong mga kababayen-an ug mga kalalaken-an nga atua nakasul-ob nianang mga bisti nga pang-Golgota, ug

madungog sila nga nagaawit nga mora og mga anghel; pinaagi sa Espiritu sa pagpang-ila motan-aw ko didto, kung—kung aduna lang ako karong buntaga og lima kanila nga pagabirahon gikan sa tibuok kalibutan, nga wala nakasala sa kahugawan, Wala ako mahibalo kon asa ko sila pangitaon. Usa kana ka pamahayag, apan Kamatuoran kana, ang Dios nahibalo niini. Ang akong kamot ania ibabaw sa Biblia. Husto kana, wala ko kabalo kung asa ko sila makaplagan. Kita n'yo, kung miingon ang Dios, “Lakaw og magkuha og lima nga nahibaloan mo.” Moingon ako, “Wala ako kabalo kung asa ako moadto.” Oh, grabe! Tungod sa grabe nga sistema! Grabe nga kahugawan!

²¹³ Mao kana ang gusto sa kalibutan. Mao kana ang gusto niini kaniadto, mao kana ang gusto niini karon. Mao kana ang maangkon niini karon. Adunay lalaki didto, nga uban-uban ang asawa sa ubang lalaki. Nagainum, nagapanigarilyo, ug nakasul-ob og toga, nga ginatakpan kana. Hunahunaa, ug makita gihapon kana sa Dios bisan pa nianang nagatabon nga dahon sa higuera. Nga si Eva nagatindog didto nga may igong kasalanan ug kahugawan sulod sa iyang kasingkasing, usab, kon kini nahimong tubig, makapalutaw gayud og sakayan. Ug motindog siya didto nga may talento nga nadawat niya sa kinaiyahan, aron mag-awit, ug giutong niya ang iyang tingog hangtud nga miitum ang iyang nawong, halos, nga naninguhang moawit nga mora'g anghel o mora'g ingon niana, ug sa ilalum niana nga toga, dunay usa ka eskandalo, kalaw-ayan, kahugawan. Ug pagtindog mo sa pulpito ug isulti kini, ug iyam-id niya ang iyang mga ngabil, nga pinintalan, mogawas dayon sa bilding, moingon, “Dili ko kinahanglan maminaw sa ingon-anang mga butang.” Apan mosinggut ka sa umaabot nga adlaw sa kalooy, didto sa impiyerno. Mamahimo kining ulahi na kaayo nianang panahona. Ginadawat mo man gud Kini samtang aduna ka pa'y kahigayonan nga dawaton Kini. Ug ikaw! Oh, grabe!

²¹⁴ Apan nagadawat ang Iglesia og usa ka Gingharian nga sa dihang nagalingkod na kita sa Langitnong mga dapit ug gibayaw ngadto sa Presensiya sa Dios, nagalingkod sa Langitnong mga dapit diha kang Cristo Jesus, ingon nga nahibalo, nga may kasiguradohan sa pagtoo, nga kita anaa sa Presensiya sa atong dinihogan nga Hari. Oh! Magkaaduna gayud og usa ka bag-ong Langit nga motungha, ug usa ka bag-ong yuta, ug nga dili na gayud magabiya pag-usab hangtud nga nagapadayon ang Eternidad. Nagapaabot kita nianang bag-ong mga Langit ug yuta. Kining ania karon, sa inyoha na kini tanan kung gusto n'yo. Alang kanako, gusto ko Kanang umalabot.

²¹⁵ Nakadepende kini kung asa n'yo ginatumong ang inyong mga hunahuna. Nakadepende kini kung unsa nga haligi kamo nakahikot. Kung nakahikot kamo sa inyong haligi sa denominasyon, matumba kamo uban niini. Kung magpahikot kamo sa unsa mang butang nga iya sa kalibutan, sa unsa

mang pulitika ug mga ingon-anang butang, ug magasalig niana, maunlod ka gayud uban niini.

216 Apan ang akong mga paglaum wala natukod sa kung asa pa man kondili sa Dugo ni Jesus nga may pagkamatarung. Ug kon mangalumpag man ang tanan palibot sa akong kalag, ug isalikway man ako sa matag ministro, ug palayason man ako sa matag kredo, ug wala na ko'y bisan usa ka lugar nga mapaingnan, Siya ang tanan kong paglaum ug sandiganan. Sa ibabaw nianang Bato, kang Cristo nianang malig-on nga Bato nga akong ginabarugan, ang tanang ubang mga dapit balas lang nga nagakaunlod. Sa umaabot nga adlaw tingali'g igoalubong na ako sa usa ka lubnganan sa kung asa man, ilalum sa dagat, o sa usa ka eroplano nga nahagsa, napatay diha sa usa ka tren o sa usa ka sakyanan, asa man nga gipili sa Dios diin ako mamatay, apan kining usa ka butang, nga nasayod ako, nga ako nang giangkla ang akong kalag dinha nianang Dalangpanan nga Kapahulayan, diha sa Iyang Pulong. Nagatoo ako niini, nga kini mao gayud ang Pulong sa Dios.

217 Kinahanglan nga hukman sa Dios ang kalibutan pinaagi sa usa ka butang. Kung magahukom man Siya pinaagi sa iglesia, hain man sa usa niini ang Iyang gamiton sa paghukom? Aba, wala ma'y ingon-ana nga magamit sa paghukom. Mao nga aduna lamang og usa ka Butang nga nahibilin, ang Iyang Pulong, Eternal Kini, dili Kini mahimong dugangan o tangtangan.

218 Giangkla ko na dinha ang akong kalag, uban ang kayano sa pagpandong sa akong mga kamot diha sa akong Halad, ginapahayag nga wala gyud og unsa man nga maayo kanako. Walay unsa man kanako, Oh Ginoong Dios. Ipadala kanako kanang Mesias ug bag-ohon ang akong pagkatawo sa kung unsa ako kaniadto, ug umola ako sumala sa Imo Mismong pamaagi, sa kung unsa ang gusto Mo para kanako.

219 Bisan unsaon pa ninyo pagsunog ang usa ka lawas, bisan unsaon pa ninyo sa pagdaut ang usa ka tawo, bisan unsaon pa ninyo sa pag-istorya batok kanila, o unsa man ang iyang isulti, sa umaabot nga adlaw pagabanhawon gyud Niya kita. Ug adunay usa ka Ginghamarian nga atong madawat nga dili matarug. Oh, pagkanindot!

220 Ug, hinumdumi, ang tanan niining mahimayaon nga butang nga atong ginatagamtam karon, nga nagalingkod sa Langitnong mga dapit, usa lamang kini ka pasiuna. Alleluyah! Pasiuna ra kini sa kung unsa ang moabot. Kini'y pasiuna lamang sa simponiya nga umalabot. Oh! Alleluyah! Kung hisgotan mismo ang mahitungod sa pagsinggit ug pagdayeg ug paghimaya, pagbayaw sa Cordero! Usa ka adlaw pag motindog na ang mga Manulonda sa palibot sa yuta, sa kurbada sa kalibutan, nga nakaduko ang mga ulo, ug madungog kanang gamay'ng grupo nga nahugasan na sa Dugo nga ginaawit ang mga

awit sa pagtubos sa Dugo ni Jesus Cristo, Oh Dios, gusto kong mahiapil kanila. Tugoti akong mapaingon na sa akong puwesto uban Kaniya karon. Tugoti ako nga masiguro ang akong kasiguradohan, nga akoa si Jesus, pagapilion ko Siya ug ang Iyang Pulong. Oo.

²²¹ Sa pagtapos, gusto kong isulti kining hamubo nga sugilanon para sa Pasko, aron nga masabtan kini sa mga bata. Ug kung gipasubo ko kamo tungod sa pagpalangay kaninyo. . . May usa ka luoy'ng babaye kagahapon. . . nagwali man si Igsoong Brown sulod sa halos usa ka oras, maanindot kaayo nga wali, sa maong dinihogan nga lalaki. Miingon ang babaye, "Gipalangan niya gayud sila og ayo." Si Pablo gani nagwali kaniadto sa tibuok gabii. Nanglingkod ang mga tawo didto hangtud nga katulgon na kaayo sila, ug tingali pipila na ka mga oras nga nanglingkod didto, ug may usa ka lalaki nga nahulog ug namatay mismo. Ug gituy-od lang ni Pablo ang iyang kaugalingon ngadto sa ibabaw sa maong lalaki, og miingon, "Ayaw mo'g kabalaka." Basta paminawa lang ninyo ang hustong butang.

²²² Aduna kaniadto og usa ka tigulang nga sapatero, ug nagatoo ko nga didto kini sa Germany kon diin niya—iyang ginahimo ang ilang mga sapatos. Ug usa niana ka adlaw samtang. . . Sa iyang bakante nga oras ginakuha niya ang Biblia, ug ginabasa niya Kini. Ginabasa niya ang konteksto ug ang teksto sa Kasulatan, ug nahimo siyang sinsero gayud. Ingon niya, "Kabalo ka," ingon niya, "Ako—ako. . . pag moabot na kining Pasko, dili ako magpasiga og bisan unsa nga Christmas tree." Pero ingon niya, "Kabalo ka kung unsa?" Ingon niya, "Mag-andam ako og usa—usa ka dakung panihapon, ug lutoon ko ang akong. . . mag-ihaw ko og karnero ug mamupo ko og mga cranberry, ug mag-andam ko og mga sarsa ug uban pa." Ug nag-inusara lang siya. Ug ingon niya, "Ibayang ko kana sa lamesa ug akong dapiton si Jesus nga moanhi og molingkod sa may lamesa sa atbang ko. Gusto kong maila ang Mesias sa Dios ug kung unsa ang mahimo kong buhaton ingon nga pagtahud." Ingon niya, "Akong—buhaton ko ang tanan nga ingon niini. Ug pagkahuman molingkod ako sa may lamesa ug mangamuyo ako og panalangin, ug pasalamatan ko gayud ang Dios tungod sa Iyang mga gihatag kanako. Ug dayon moingon ko, 'Ginoong Jesus, mahimo ba nga moanhi Ka ug molingkod dinhi sa atbang ko, para sa pang-Pasko nga panihapon uban kanako?'"

²²³ Tungod sa kayano, kana sa kanunay ang ginadungog sa Dios, ang pagkasinsero. Ug gitigum sa tigulang nga sapatero ang iyang kuwarta aron makaandam og ingon niadto nga panihapon, kabalo na mo, ug dapiton niya ang sa Hari sa mga hari. Ug nangandam na siya, ug nagluto, ug gibayang niya kadto sa lamesa. Ug nanglimpyo siya og ayo sa iyang kaugalingon, ug—ug gihan-ay ang iyang kaugalingon, ug gisudlay ang iyang buhok. Ug milingkod na siya sa lamesa, ug nagbutang og usa

ka lingkoranan para kang Jesus, ug may pipila pa ka mga lingkoranan nga napahimutang sa palibot. “Mahimong para kini sa mga apostoles,” ingon niya, “kung moanhi pud sila.”

²²⁴ Ug giduko sa maong tigulang nga lalaki ang iyang ulo ug nangamuyo siya og panalangin, ug—ug nagpasalamat sa Dios alang sa maong pagkaon. Ug miingon siya, “Karon, Jesus, mahimo ba nga moanhi Ka ug mokaon uban kanako para niining panihapon sa Pasko?” Ug nagsuod na siya nga mikaon ug ginatan-aw ang lingkoranan. Wala gyu’y miabot. Mikaon pa siya og diyutay, ug ingon niya, “Ginoong Dios, gidapit ko Ikaw nganhi sa akong panimalay. Mahimo ba nga moanhi Ka ug mouban kanako?” Ug mokab-ot na unta siya ug mokuha og makaon, ug adunay nanuktok sa pultahan.

²²⁵ Ug miduol siya sa pultahan. Usa kadto ka tigulang na nga lalaki, nagtikubo na ang mga abaga, og nagkagidlay. Miingon ang tigulang nga lalaki, “Buotan nga lalaki, gitugnaw ako, puede ba akong mosulod aron magpainit?”

²²⁶ Ug miingon ang sapatero, “Sulod ka.” Ug misulod ang tigulang nga lalaki ug iyang nasimhot ang kahumot sa pagkaon, medyo naglaway siya, og milingi siya sa palibot. Miingon ang sapatero, “Mahimo ba nga molingkod ka?” Miingon pa, “May gipaabot ako nga bisita, pero mahimo ba nga molingkod ka ug mokaon uban kanako hangtud nga moabot ang maong nga bisita?”

²²⁷ Miingon ang tigulang nga lalaki, “Salamat. Malipay gyud ko.” Ug molingkod siya, ug nanihapon sila. Nagpasalamat kaniya ang tigulang nga lalaki, mitindog ug milakaw na.

²²⁸ Ug miliso ang—ang sapatero, ingon niya, “Ginoong Dios, nganong Imo man kong gipalaw?” Ingon pa, “Giandam gyud nako ang tanan. Gibuhat ko ang tanan nga nahibaloan kong buhaton.” Kung buhaton pud unta ninyo ang ingon-ana! “Gibuhat ko ang tanan nga nahibaloan kong buhaton, ug nagdahum nga moabot Ka ug mokaon uban kanako.” Ug mihilak siya, ug midagan ug mihigda sa higdaanan. Ug naghigda siya didto sa higdaanan, nga nagahilak. “Ako—ako—gibuhat ko ang tanan nga gidahum kong husto, Ginoo, ug nganong wala man Ka miabot aron mokaon uban kanako?”

²²⁹ Ug may usa ka Tingog nga miabot kaniya, ug nahinumduman niya ang Kasulatan, “Sa pagkamatuod nga gibuhat ninyo kini ngadto niining Akong labing mga gagmay, gibuhat ninyo kini Kanako.”

²³⁰ Oo, si Irenaeus . . . pasayloa ko, si San Martin diay kadto. Usa niadto ka matugnaw nga adlaw sa wala pa ang Pasko, may usa ka luoy’ng tigulang nga tigpalimos ang naghigda sa dalan, nga nagakurog tungod sa katugnaw. Milabay lang ang dungganon nga mga tawo, ug gitan-aw lang ang tigulang nga tigpalimos. “Bueno, wala ma’y unsa man kaniya, usa lang siya ka tigpalimos.

Pasagdi lang siya nga maghigda dinha.” Ug mitindog si Martin ug naniid ug gitan-aw kung aduna ba’y pipila niadtong mga tawo ang makahimo sa pagtabang niadtong makililimos, pero wala sila mitabang.

²³¹ Sa ulahi, si Martin mismo wala...siya—nagatoo siya sa Dios, apan usa siya ka sundalo. Aduna siya’y usa lang ka kupo. Miingon siya, “Kung kanang tigulang padayon lang nga maghigda nga ingon niana, mamatay gyud siya sa katugnaw.” Busa gikuha niya ang iyang espada ug gigisi ang iyang kupo sa duha ka bahin, miduol ug giputos niadto ang tigulang nga tigpalimos, ug miingon, “Matulog ka nga malinawon, igsoon ko.” Dayon milakaw na.

²³² Ug niadtong gabhiona sa kwartel sa mga sundalo, human nga iyang gipasinaw ang iyang botas ug mihigda na, natulog na siya. Ug nakamata siya tungod sa kabanha. Mitan-aw siya, ug didto sa iyang atubangan, nagtindog si Jesus nga sul-ob kadtong daang kupo nga iyang giputos sa maong tigpalimos.

²³³ Unsa ba’y mahimo kong buhaton sa niining mga butanga kung ingon-ana? Unsa ba’y angay kong buhaton sa niining mga butang nga nahibaloan kong husto, sa niining mga butang nga gipanghimatud-an na ug gipamatud-an nga husto ang mga niini? Unsa man ang mahimo kong buhaton? Iputos ang Iglesia, dili sa usa ka kredo o usa ka denominasyon, kondili sa Dugo ni Jesus Cristo pinaagi sa Iyang Pulong. Mao nga miingon si Jesus, “Kung unsa ang gibuhay ninyo ngadto sa mga niini, gibuhay ninyo Kanako.”

Mag-ampo kita.

²³⁴ Ginooong Jesus, kung nagatindog Ka dinhi karong buntaga, Ginoo. . . nasayod ko nga ania Ikaw, sa espirituwal nga porma. Apan kung nagatindog Ka dinhi, sa literal, nagatoo ko nga dili gyud nako usabon ang akong teksto bisan gamay. Nagatoo ako nga mao ra gihapon ang akong isulti. Ug nagatoo ako, Langitnong Amahan, nga kini nga mga tawo nga wala pa nakakaon sa ilang natural nga pagkaon, nagalingkod sila dinhi ug naminaw sa usa ka kapoy na ug sagarat nga tingog, apan kung dili pa tungod nga ania Ka, wala gyud unta sila nakapabilin pa, pero nagatoo sila nga ania Ka, tungod kay Imo man kining Pulong. Ginapakita lang niini nga gihigugma Ka nila.

²³⁵ Mapasalamaton kaayo kami tungod niini nga pagduaw karong Pasko sa Balaang Espiritu nga nagagiya kanamo ug ginapakita kanamo kung unsa gayud ang Pasko. Sa diha nga makita namo nga nagakalumpag na ang kalibutan, nagakabungkag na ang mga sistema niini. Apan malipayon gayud kami, mapasalamaton kaayo kami nga aduna kami’y usa ka Gingharian ug aduna kami’y usa ka Hari, ug dili Kini matarug. Ug sa diha nga wala na’y kalibutan, sa diha nga wala na’y pulitika, sa diha nga wala na’y mga nasud, pagatukoron

sa Dios ang Iyang Ginharian ug magahari ang mga matarung kauban Niya. Ang mga nanag-antus dili na magaantus pa.

²³⁶ Tabangi kami, Ginoo, sa niining panahon sa Pasko, nga hinumduman kung unsa ang kahulogan sa dinihogan nga Mesias. Tabangi kami nga makasabot.

²³⁷ Panalangini kining, among kongregasyon. Ubani sila, among Amahan, ug ihatag kanila ang pagkamatarung ug pakigdait sa Balaang Espiritu. Panalangini ang among pastor. Ginoo, gihugma namo siya. Kining maisogon nga alagad nga nagapabilin gayud nga matinud-anon. Ug, namulong siya niadtong miaging gabii, miingon, “Ania ako, nga halos saisenta na.” Aduna pa sila’y gagmay’ng mga anak. Apan hinumduman unta, hinaut nga mahinumduman niya kini, Ginoo, nga walay unsa man ang makapahilayo kaniya gikan dinhi hangtud nga andam Ka na. Kung magdugay pa Ka, ginaampo ko nga mabuhi pa siya nga makita ang tanan niyang mga anak nga maminyo ug magkaaduna og kaugalingon nilang mga panimalay. Panalangini pud ang iyang bililhong buotang asawa, ang Imong ubos nga alagad nga babaye. Panalangini ang among mga diyakono ug ang among mga tinugyanan.

²³⁸ Ug, Dios, mapasalamaton ako karong Pasko tungod sa tanan niining, akong mga higala nga mibiyaha latas sa mga niyebe, ug miagi sa danlog nga mga kalsada ug ulan, ug dala ang ilang mga panginabuhian ug mibiyaha og ginatus-gatus ka milya. Dios, wala na ko kabalo kung unsa pa’y isulti. Nagasalig ako nga Imong ipadayag ang uban pa niini, kung unsa ang anaa sa akong kasingkasing. Ug hinaut nga magmatinuuron ako sa kanunay, Dios, sa niining Ginharian nga Imong gipahimutangan kanamo. Hinaut nga dili gayud ako mopakigkompromiso, dili gayud, sa tuo man o sa wala. Mahinumduman pa gayud nako sa dihang gisultihan Mo ako kaniadto, “Ayaw gyud pagsimang ngadto sa tuo o sa wala, aron magmauswagon ka sa imong panaw. Dayon makab-ot mo ang maanindot nga kalampusan.” Tingali’g dili sa mga mata sa kalibutan. Ug dili ko igsapayan kung unsa man ang ginahunahuna sa kalibutan, ginatinguha kong mahibaloan kung unsa ang Imong gusto, Ginoo. Ang Imong tinguha mao ang among . . . Ang Imong kabubut-on mao ang among tinguha. Oh, ang pinakagamay sa Imong mga tinguha usa—usa gayud ka pangtibuok-kinabuhi nga sugo para kanamo, Ginoo. Ania kami ingon nga Imong Iglesia.

²³⁹ Pasayloa kami karon sa kung unsay nangahitabo sa tibuok tuig, nga nakabuhat kami og sayup ug kon diin napakyas kami sa daghan kaayong mga bahin, ug lig-ona intawon kami, Ginoo. Ug hinaut nga kami, niining panahon sa pagsaulog sa Pasko, hinaut nga ablihan namo ang among mga kasingkasing alang sa Mesias, ang dinihogan sa Dios. Hinaut nga mosulod Siya sa among mga kinabuhi ug dihogan kami, ug makinabuhi namo ang

Iyang kabubut-on ug mamatuman ang Iyang Ginghamarian pinaagi sa among mga kinabuhi. Ipapabilin kami nga himsog, og may maayong panglawas.

²⁴⁰ Panalangini kining maisogon kong tigulang nga higala nga nagalingkod dinhi tupad nako, si Igsoong Arganbright. Oh Dios, giubanan Mo gayud siya, ug kung unsa nga nadugmok na gayud ang iyang kasingkasing sa makadaghang higayon, apan sa gihapon nagatoo kami nga miturok na siya nga dunay Kinabuhing Walay Katapusan. Panalangini ang iyang buotang asawa. Nahunahuna ko si Bud ug si Fred, kami, Oh Dios, kung unsa nga aduna kami niining maanindot gayud nga pagpakig-fellowship.

²⁴¹ Ginaampo namo nga panalanginan Mo kaming tanan karon. Panalangini ang among gamay'ng iglesia, ang tanan niining bililhon nga mga tawo. Ug sa umaabot nga adlaw, Ginoo, samtang kami'y bug-os gayud...ginatinguha namo nga ang among mga mata ingon na ka limpyo gikan sa mga butang nga iya sa kalibutan nga ang Dios lamang ang among makita ug ang Iyang Ginghamarian, nga sa umaabot nga adlaw igapresentar kami sa atubangan ni Cristo, nga walay-ikasaway, ingon nga usa ka birhen nga ulay, nga kabahin nianang halangdong Iglesia nga magaduol sa Iyang atubangan.

²⁴² Ug dayon pagalauman namo ang panahon kon diin Imo nang pagatukoron ang Imong Ginghamarian dinhi sa yuta, nga may mga tawo nga makita uban sa mga makita nga panimalay, ug sila dili magatanum ug unya lain ang magakaon niini, kondili mabuhi sila sa Walay Katapusan. Hangtud nianang panahona, itugot nga mahimo kaming kahayag nga gipahimutang ibabaw sa usa ka bungtod, usa ka kandila nga nagahatag og kahayag sa tanan nga anaa sa palibot namo, pinaagi sa usa ka matarung nga kinabuhi, nga gibalaan pinaagi sa Dugo ni Cristo. Itugot kini, Amahan. Sa Ngalan ni Jesus kami nagaampo.

²⁴³ Ug, Ginoo, sa niining mga panyo, human nga among giampo ang mga may sakit ug gipandong ang among mga kamot diha kanila, nga ginakonekta ang among mga kaugalingon diha kanila, ginapandong ko ang akong mga kamot nganhi niining mga panyo, ginakonekta ang akong pag-ampo ngadto sa Dios. Ug sa niining mga panyo ug sa mga tawo nga nakalakip niini, Dios, nagaampo ako nga Imong ayohon ang matag usa niining mga tawo nga ginarepresentar niining mga panyo. Hinaut nga sila makaangkon og maayong panglawas ug kusog sa umaabot nga tuig, Amahan. Alang sa kadungganan ug kahimayaan sa Dios, kami nagapangamuyo, sa Ngalan ni Jesus. Amen.

I love Him, I love Him
Because He first loved me
And purchased my salvation
On Calvary's tree.

²⁴⁴ Karon samtang ginaawit nato kini pag-usab, makiglamano kita sa mga anaa sa palibot nato. Magpabilin lang, nga nagaingon:

I love Him, I love Him
Because He first loved. . .

Igsoong Arganbright, kining. . .? . . .


Karon samtang nakataas ang atong mga kamot ngadto Kaniya.

I love Him,
Karon sa ingon ka lanog gayud.
I love Him (Ingon-ana mismo.)
Because He first loved me
And purchased my salvation
On Calvary's tree.

²⁴⁵ Ug karon kining pulonga, isulti natong tanan kini, nga magkadungan: Magadawat kita og Ginghamarian nga dili matarug. Amen!

²⁴⁶ Karon manindog kita. Karon, ipataas nato ang atong mga kamot ug ang atong mga kasingkasing ngadto sa Dios, nga may pagpasalamat mismo, nga tininuod gayud, sa tibuok natong kasingkasing, "Gihigugma ko Siya!" Ug ipahayag n'yo gayud kini ngadto Kaniya niining panahon sa Pasko.

I love Him, I love Him
Because. . .
And purchased my salvation
On Calvary's tree.

²⁴⁷ May usa ka buluhaton sa pagbautismo nga mosunod dayon niini karon. Ug kamo nga kinahanglan nang manguli, nagapasalamat kami nga nakaanhi kamo, ug hinaut nga magpabilin kamo nianang Ginghamarian nga dili matarug. Samtang ginaduko nato ang atong mga ulo sa makadiyut alang sa pag-ampo, hangyoon ko ang minahal natong Igsoong Arganbright kung mahimo moduol siya dinhi ug ipapauli na kining mga mananambong diha sa usa ka pag-ampo. 

62-1216 Ang Pagkalumpag Sa Kalibutan
Branham Tabernacle
Jeffersonville, Indiana U.S.A.

CEBUANO

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org